

1 Coodintoidi

inānite Pabodo cadota ante tānota nānō yewæmongainta

Coodinto iñömō Codito ingante nāni pōnencabo

¹ Wængonguī angā ēñēninque Itota Codito botō imote aa pedinque da godongā godōmo inte botō Pabodobo yewæmōmopa. Mōnō tōniñacā Totēnē tōnō guēa apænete ate yewæmōmo aedāni.

² Coodinto iñömō mīnitō Codito ingante mīni godongāmæ pōnencabo inōmīni inte ēñēedāni. Wængonguī, Botō quīmīni badinque mīnitō Itota Codito nempo quēwēninque tæiyæ waēmō ēwocate quēwencæmīnimpa, ante cædinque añēcā pōnīmīni inte mīnitō acæmīnimpa, ante yewæmōmopa. Ayæ adobai, Mōnō Awēnē Itota Codito emōwo ante nē aa pedāni tōmāmæ quēwēnāni incæ acædānimpa, ante yewæmōmopa. Itota Codito iñömō mōnō Awēnē ingā incæ tōmēnāni Awēnē adocā ingampa.

³ Mōnō Mæmpo Wængonguī tōnō mōnō Awēnē Itota Codito godongāmæ waadete pōnō cæda ate mīnitō gānē pōnente quēwencæmīnimpa, ante botō Totēnē tōnō amōnapa.

Codito nānō entawēnō bai nanguī entawēmompā, ante

⁴ Wængonguī waadete pōnō cæcā ate mīnitō Codito Itota nempo quēwēninque tōmengā nānō entawēnō bai nanguī entawēmīnīpa, ante adinque botō mīnitō beyæ ante Wængonguī ingante waa ate pōnēninque cōwē apænebopa. ⁵ Edæ

Codito nempo quëwëñömīnīte tōmēngā nānō ate ëñēngāinō ante pōnō apænecā ëñēnīnque mīnitō do entawēmīnīpa. Īnīnque mānīnō nānō ate ëñēngāinō ante eyepæ entawēmīnī Īnīnque mīnitō nō apænēmīnī bamīnīpa. ⁶ Edæ mōnitō, Itota ĩñōmō adocā mōnō Codito ĩnongā ĩngampa, ante apænēmōnī ëñēnīnque mīnitō Ao ānīnque, Nāwangā ĩmpa, ante wede pōnēnīnque waa cæte quëwēmīnī acæĭmpa.

⁷ Mānīnō beyæ, Mōnō Awënë Itota Codito æyedēnō pōnīnque edonque pōnī a ongongūngā, ante wānō cōnīnque mīnitō wæntæye badāmaĭ ĩncāmīnīmpa, ante cædīnque Wængonguĭ Ōnōwoca pōnō apænecā ëñēnīnque mīnitō eyepæ ĩnte waa cæquĭmīnī ĩmīnīpa. ⁸ Mīnitō cōwē ĩnque baganca tæĭ ongonte oda cædāmaĭ ĩncāmīnīmpa, ante Wængonguĭ pōnō cæcā ate mōnō Awënë Itota Codito pōñedē māñīñedē ate mīnitō wentamō ædō cæte entawēnguĭmīnī. Edæ dæ ampa. ⁹ Wængonguĭ, Botō Wēngā Itota Codito ĩñōmō mīnitō Awënë ĩnongā ĩngampa. Īnīnque mīnitō tōmēngā nempo quëwēnīnque tōmēngā tōnō godongāmæ cæte quëwēncāmīnīmpa, ante mīnitō ĩmīnīte āñete aa pecantapa. Mānōmaĭ ante nē aa pecā ĩñōmō tōmēngā nānō angāinō baĭ edæ cōwē nē ædæmō cæcā ĩngampa cāmīnī.

Wæætē godō wæætē godō cædāmaĭ ĩedānī, ante

¹⁰ Botō tōñīñamīnī, botō mōnō Awënë Itota Codito ëmōwo apænēdīnque ĩmaĭ ante āmo ëñēmāīmīnīpa. Mōnō pōnēncabo ĩmōmpa, ante adodō pōnēnīnque mīnitō tōmāmīnī godongāmæ Ao ante adodonque cædīnque nāwæ godāmaĭ

iedäni. ¹¹ Botö tönñamini apænebo eññedäni. Codoedi minitö iminitedö ante apænedinque, Coodintoidi nani pönencabo incæ wæætë godö wæætë godö tedewänänpa. ¹² Ante apænedäni eññenque botö, İmaï impa, ante apænebo eññedäni. Pancaminiya, “Mönitö Pabodo nänö nê emiññämöni imönipa,” ante cæminipa. Pancaminiya guiquënë, “Apodo nänö nê emiññämöni imönipa,” ante cæminipa. Pancaminiya guiquënë, “Pegodo nänö nê emiññämöni imönipa,” ante cæminipa. Ayæ wæætë pancaminiya guiquënë, “Codito nänö nê emiññämöni imönipa,” ante cæminipa. Mänömainö ante minitö wadö wadö ante tedewëmini awædö.

¹³ İñæmpa Codito nämä incæ ante dicæ wadö wadö ante apænecantawogaa. Incæte Codito nempo quëwëmini inte minitö, Pabodo emiññämöni imönipa, ämini. Apodo emiññämöni imönipa, ämini. Pegodo emiññämöni imönipa, ämini. Ayæ botö Pabodobo iñömote wadäni awæ ñænquedimæ gönöningue minitö beyæ wænönäni dicæ wæntawogaa. Ayæ botö Pabodobo emöwo apænedinque minitö dicæ æpænë guiminitawogaa. ¹⁴ Botö minicabo weca quëwëningue Codipo tönö Gayo inate mäninaque inate æpænë guidömo guiidatapa, ante pönëningue waa tobopa. ¹⁵ Mänömai i adinque minitö, Pabodo emöwo apænedinque æpænë guitamönipa, ante ædö cæte angüimini, ante tobopa.

¹⁶ Æ, tæcæ pönëmopa. Etepänäidi inänite adobaï guidömo guidänitapa. Wadäni inänite wabänö guidömoï, ante wii pönëmopa. ¹⁷ Edæ Codito, Bitö æpænë guidömi guicädänimpa, ante botö imote änämaï ingacäimpa. Wæætë, Tæi

pīñænogä inte Codito mönō wædō ante teēmē mongænte ñænquedimæ wængä beyænque mönō quëwengæimpa, ante apænebi ëñencædänimpa. Ayæ, Mänine ante wadäni, Önonque impa, ante änämaï incædänimpa, ante wææ cædinque bitō waodänique nāni nanguï ëñente apænedō ante apænedämaï incæbiimpa. Wæætë, Codito ingantedō ante watapæ apænebi ëñencædänimpa, äninque Codito botō imote da godongä gobo imopa.

Codito Wængonguï nänō ëñënō entawëninque tæï nänō pīñcënō entawengampa

¹⁸ Itota ingante nāni timpogaiwæ ante apænemöni adinque nē wænguināni guiquënë, Mäniwæ ante apænete wædänitedō abi, ante badete todänipa. Codito ængä beyænque nē quëwëmöni guiquënë, Codito mäniwäa wængä beyænque Wængonguï tæï pīñænte pönō cæcampa, ante wede pönente apænemönipa. ¹⁹ Edæ Wængonguï, İmaï cæcæboimpa, angampa, ante yewæmonte ongompa.

“Në adäni önonquedō ante ëñënänipa, ante botō nanguï nāni ëñënō ante wido cæcæboimpa.

Në nämä mä pönente ëñënäni guiquënë önonque ëñënänipa, ante botō nämä nāni ëñënō ante Baa ancæboimpa,”

ante Wængonguï cæcampa, ante yewæmongatimpa.

²⁰ Mänömaï cædinque Wængonguï, Inguipogaque quëwënäni nāni nanguï ëñënō incæ önonque impa, ante ëñenguënë quëwëmini, ante do odömongampa. İninque adocanque ingante, Nanguï ëñëmipa,

ante Wængonguī dicæ anguingāa. Dodāni nāni wææ angainō ante nē nō odōmōmi īmipa, ante Wængonguī dicæ anguingāa. Nāmā mā pōnēninque nē nō apænebi īmipa, ante Wængonguī dicæ anguingāa. Edæ dæ ampa. ²¹ Edæ, Inguipogaque quēwēnāni ocaidē nanguī ēñēnāni incæ ōnonque nāni ēñēnō beyænque botō īmote ædō cæte ate bai pōnenguīnāni, ante Wængonguī nē nō ēñēnongā inte cæcampa. Codito nānō cægāinō ante apænemōni adinque īināni īñōmō, Ōnonque tedewēnānitedō abi, ante badete todānipa. Īñæmpa Codito nānō cægāinō ante badete nāni todō beyænque mīnitō wæætē nē wede pōnēmīni inte quēwencæmīnimpā, ante Wængonguī nōingā pōnēninque pōnō cæcampa.

²² Oodeoidi, Ōönædē nāni mā cæī bai bamōnengæ cæmīni ate ēñēmaīmōnipa, ante ānewēnānipa. Guidiegoidi guiquēnē, Nāmā mā pōnēninque ēñēmaīmōnipa, ante cædānipa. ²³ Mōnitō guiquēnē, Codito ingante awænēmæ timpote wænōnāni wængacāimpā, ante mānīnonque ante apænemōni ēñēmīnipa. Mānōmaīnō ante apænemōni ēñēninque oodeoidi guiquēnē Baa ante tee tēwate bai oda cædānipa. Guidiegoidi guiquēnē mānīne ante ēñēninque badete todānipa. ²⁴ Mōnitō oodeomōni īñōmōnite mīnitō guidiegomīni īñōmīnite ædānimē īnānite Wængonguī apænte ængā ingāimō inte mōnō īñōmō edæ īmaī ante pōnēmompā. Wængonguī nānō nō ēñēnō incæ Codito encacampa, Wængonguī nānō tæī piñænō incæ Codito entawengampa, ante do edæ ēñente pōnēmompā.

25 Wængonguī ōnonque ante cæcampa, ante pōnēwēmīnitawoo. Mōnō waocabo nanguī ēñēmō īmompā, ante pōnēmīnitawoo. Īñæmpā, Nanguī ēñēmō, ante tedewēmō incæ ōnonque wædāmō inte cæmompā. Wæætē Wængonguī guiquēnē ōnonque cæte bai cæcā incæ godōmenque gomonga nanguī ēñengā inte cæcampa. Ayæ, Wængonguī aquīngā inte cæcampa, ante pōnēmīnitawoo. Īñæmpā mōnō waocabo tæi piñæmō īmompā, ante tedewēmō incæ mōnō ōnonque aquīimō inte cæmompā. Wæætē Wængonguī guiquēnē nē ōnonque cæte bai cæcā incæ godōmenque gomonga tæi piñængā inte cæcampa.

26 Īñānāni, æbānō īñōmīnite Wængonguī aa pecantapa, ante pōnēedāni. Tōmāmīni dicæ nanguī ēñēmīni ingamīniyaa. Inguipogaque quēwēnāni nanguī nāni encadō bai mīnitō tōmāmīni dicæ adobai nanguī encamīni ingamīniyaa. Tōmāmīni dicæ nanguī tæi piñæmīni ingamīniyaa. Awēnēidi pæingā nānō awēnē baquinque ēñacā bai mīnitō tōmāmīni dicæ adobai awēnē baquinque ēñamīniyaa. Mānōmaī īñōmīnite Wængonguī dicæ aa pecantawogaa. Incæte adocanque adocanque mānōmaī īñōmīnite Wængonguī aa pegacāimpa.

27 Wæætē, Nē nanguī ēñēnāni incæ guīñente wæcædānimpa, ante cædinque Wængonguī īmaī cægacāimpa. Inguipoga quēwēnāni īnānite cōwā adinque nē ōnonque cæi bai cædāni īnānite apænte ængacāimpa. Ayæ, Nē tæi piñænāni incæ guīñente wæcædānimpa, ante cædinque Wængonguī inguipoga nē wæntæte cædāni īnānite apænte ængacāimpa. Īnīnque tōmengā

mänömaï cæcä ate waa cædänipa, ante adinque nē tæi piñænäni wæætē guñente wædänipa. ²⁸ Wængonguï inguipoga quëwënäni näni waa pönï mäincoo ëwente bai bacæimpa, ante cædinque, Inguipoga pancacooga wiwa incoo impa, ante adinque mänincooque æninque waa cægacäimpa. Ayæ, Önoncooque impa, ante mönö änoncoo adinque tömengä ingante do æninque nö cægacäimpa. Ayæ, Dæ ampa, mönö änoncoo incæ do adinque Wængonguï mänincoo æninque nanguï cægacäimpa. ²⁹ Ìninque Wængonguï weca ongöninque waocä adocanque incæ, Waëmö ïmopa, ante ædö cæte anguingää.

³⁰ Wængonguï pönö ængä beyænque mïnitö Codito Itota nempo quëwëminipa. Wængonguï Codito Itota ingante da pönongä æninque mönö Codito nänö ëñënö bai ænte entawëmompä. Tömengä nempo quëwëninque mönö tömengä nänö nö cæte quëwënö bai adobai ænte entawëmompä. Ayæ tömengä tæiyæ waëmö nänö ëwocadö adobai pönongä æninque tæiyæ waëmö ëwocate quëwëmompä. Ayæ Codito ængä beyænque mönö abæ tawænte gote bai quëwëmompä. ³¹ Ìninque Wængonguï beyæ nani yewæmongainö bai iïmaï ante bacæimpa. “Waocä, botö nanguï waëmö pönï ïmopa, ante nämä waa ate apæneinente wædongä iñömö tömengä wæætē, Mönö Awënë adocanque waëmö pönï ingampa, ante apænecä ïninque waa cæbaingampa.”

2

Itota Codito ingante awäa timpodäni

wængacäimpa, ante

¹ İñänäni botö mīnitö weca apæ necæte ante mā pōninque nē nanguī ēñēnāni nāni waa ēñēnō bai ēñēnāmaī imo inte bai pontabopa. Waodāni nāni waa tede bai tededāmaī imo incæ pontabopa. Wæætē, Wængonguī nāwangā waa pōnī cægacäimpa, ante mäninonque ante apæ necæte ante pontabopa. ² Itota Codito ingante do adīmo inte botö, Tömenganque nānō cægainonque ante ēñente bai cædinque botö coodintoidi weca gote apænebote, ante godāmaī iñedē do änōmoimpa. İninque, Wadö nāni nanguī ēñēnō ante ēñēnāmaī inte bai cædinque botö, Itota Codito ingante awāa timpodāni wængacäimpa, ante mäninonque ante ēñente bai gote apænebote, ante pōninque mīnitö weca pontabopa. ³ Ayæ botö aquīmo pōnī inōmo inte mīnitö weca pōninque, Ædö cæte apænequīmo, ante guīñēnete wædinque nanguī do do wāate pōmo amīnitapa. ⁴ Pōninque botö, Mänōmaī impa, ante dicæ tōmēmo nanguī ēñēnō ante tedetabogaa. Wængonguī beyæ apænebo ēñēedāni, ante änīmo incæ botö dicæ waa pōnī tedete bai apænetabogaa. Wæætē Wængonguī Önōwoca tōnō äawocaque bai ewocadinque botö tōmengā nānō tæi piñænō beyænque apænebo amīnitapa. ⁵ Mänōmaī cædinque botö, Waomō mōnō nanguī ēñēnō beyænque ante wīi pōnencæminimpa. Wæætē Wængonguī nānō tæi piñænō beyænque wede pōnēmini bacæminimpa, ante cæcæte ante mänōmaī ponte apænetabopa.

Wængonguī cæbänö emongää, ante tōmengä

Önöwoca odömongä eñēmompa, ante

6 Wæætē ædæmō pōnēnāni æmæwo pæte bai iñōnānite mōnitō tōmēnāni weca ongōninque mōni nanguī eñēnīnō ante apænemōnīpa. Incæte ñōwodāni nāmā nāni eñēnō ante apænedāmaī īmōnīpa. Ayæ īmæca awēnēidi nāni dæ goquincabo tōmēnāni nāni eñēnō ante apænedāmaī īmōnīpa.

7 Wæætē Wængonguī awēmō iñonte nānō eñengainō ante apænemōnīpa. Tōmengā iñōmō, Botō nanguī eñēnōmo inte pōnō cæbo beyænque botō nē apænte ænānique ñāō apāite bai entawencædānīmpa, ante inguipoga dæ āñedē wēēnēñedē pōnī incæ mōnō īmonte ante pōnō cægacāīmpa. Incæte, Mānōmaī cæcæboīmpa, ante tōmengā nānō eñēnō ante wadāni eñēnāmaī incædānīmpa, ante wææ cædinque wē wodonte bai cædinque tōmengā nānō eñengainō ante ñōwo ganca awēmō iñōmō entawēnongāīmpa. Ñōwo iñōmō tōmengā awēmō nānō eñengainō ante tæcæ apæncā eñēnīmōni inte mōnitō wæætē mānīnō ante ñōwo apænemōnīpa. 8 Inguipoga awēnēidi guiquēnē Wængonguī nānō wē wodonte eñengainō ante dicæ eñēnāniyaa. Edæ mānīnō ante eñente bai tōmēnāni mōnō Awēnē ñāō bai entawēnongā iñongante awāa timpote wænōnāmaī incædōnānīmpa. 9 Wæætē īīmaī ante yewæmongatīmpa.

“Botō īmote nē waadete pōnēnāni iñōmō watapæ quēwencædānīmpa,
ante Wængonguī do pōnō badongacāīmpa.
Mānīnō nānō pōnō cægainō ante waocā dicæ acāa.
Mānīnō ante dicæ eñengāa.

Edæ waocä nämanque mä pönëninque dicæ
ëñengäa,”

ante näni yewæmongai bai iinque bacæimpa, ante
mönitö apænemönipa. ¹⁰ Wængongui Önöwoca
guiquënë tömää cöwä adinque Wængongui awëmö
nänö pönö badongainö ante edonque adinque
do ëñengampa. İinque mönonga pö guidinque
tömengä mönö imonte edonque odömongä
ëñëmompä.

¹¹ Edæ mönö waocabo incæ, Adocanque
önöwënenque pönëë cöñongante wacä, Æbänö ante
pönëë congäa, ante ædö cæte ëñengüingäa. Edæ
në pönëë congä guiquënë, Botö æbänö ante pönëë
cömoo, ante tömengä adocanque önöwënenque
pönente ëñengampa. Wængongui adobai ingampa.
Wængongui æbänö ante awëmö pönëë congäa,
ante waocä ædö cæte ëñengüingäa. Wængongui
æbänö ante pönëë congäa, ante tömengä Önöwoca
adocanque ëñëñongä wadäni ëñënämaï inänipa.

¹² Wængongui iñömö, Botö æbänö pönömo æminii,
ante edonque acæminimpa, ante cædinque tömengä
Önöwoca ingante da pönongä ænte ewocate
amompä. İinque inguipogaque quëwënäni
näni pönënö bai entawënämaï inömö inte mönö
Wængongui tömengä Önöwoca tönö äawocaque bai
ewocamö inte do ëñëmompä.

¹³ Mönitö iñömö, Wængongui mänömaï pönö
cæcampa, ante odömoncæte ante mä pönente
möni ëñënö ante apænedämaï imönipa. Wæætë
Wængongui Önöwoca pönö odömonte apænecä
ëñente ewocadinque tömengä nänö odömönö möni
ëñënö ante apænemönipa. Edæ Wængongui

Önöwoca nänö pönönö ante eñencæte ante Wængongui Önöwocaque nänö apænedede ante apænete eñente ewocacæimpa, ante pönëninque mönitö mänineque ante apænemönipa.

¹⁴ Edæ, Wængongui Önöwoca nänö pönönö æbänö i, ante tömengä Önöwoca tönö äawocaque bai në ewocadänique pönente eñënanipa. Ìniquene në ömæwocacä bai ingä guiquënë tömengä ædö cæte edonque eñengüingää. Edæ oda cæcampa. Mäninö ante apænemöni eñëninque tömengä, Önonquedö ante apænete wæcantedö abi, ante badete todinque edæ, Baa angampa. ¹⁵ Wængongui Önöwoca tönö äawocaque bai në ewocacä guiquënë, Tömää æbänö i, ante cöwä adinque edonque pönö eñengüingää. Wæætë edæ, Tömengä æbänö ewocacää, ante wadäni cöwä adäni incæte ædö cæte apænte angüinänii. ¹⁶ Ayæ, “Wængongui Awënë æbänö nangui eñente pönengää, ante æcänö eñengüingää. Edæ Wængongui ingante godömenque odömönänipa diyæ eñente baquingää,” ante yewæmongatimpa. Mönö guiquënë Codito eñente nänö pönönö ante entawëmompä.

3

Wængongui ingante në cæmö mönö godongämæ cæcabo

¹ Ìñänäni eñëedäni. Codito Önöwoca tönö në ædæmö ewocadäni inänite botö Wængongui Önöwoca nänö apænedö ante do apænebopa. Minitö guiquënë mempoga eñamini inte Codito nempo quëwëmini incæ tæcæ eñadäni bai pædämaï inömäni inte munitö inguipogaque ante pönëmäni

awædö. Mänömaï beyæ botö adobainö ante ædö cæte mīnitö imīnite apænequimoo. ² Edæ tæcæ eñadāni iñömö tæëmö mönö cænguï capo capo cænāmaï inānipa. Mīnitö iñömö tōmēnāni bai adobai imīni inte Wængonguï Önōwoca nānō apænedö ante ædö cæte eñenguimīni. İninqe tæcæ eñadingā ingante goömæ di godōnete bai cædinque botö mīnitö imīnite apænedinqe adodeque adodeque apænebo eñēmīnitapa. İñæmpa ñōwo ganca tæcæ eñadāni bai inōmīni inte mīnitö æiquedö eñenguimīni. ³ Edæ cōwē inguipogaque ante pōnēmīni inte pancamīniya, Wacā gomonga cæcampa, ante pīinte wæmīnipa. Pancamīniya guiquēnē wæætē godö wæætē godö pīinte ānewēmīnipa. Mänömaï cæte quēwēninqe mīnitö ömæwocadāni bai imīni inte inguipogaque ante pōnente quēwēmīni abopa. ⁴ Edæ iïmaï ante tedewēmīnipa. Adocanque, “Botö Pabodo nānō nē emiñæmo imopa,” ante cæcampa. Wacā, “Botö guiquēnē Apodo nānō nē emiñæmo imopa,” ante cæcampa. Mänömainö ante mīnitö ömæwocamīni inte bai cæmīni awædö.

⁵ İñæmpa, Apodo æcānō ingää, ante pōnēmīni. Pabodo æcānō ingää, ante pōnēmīni. Edæ botö mönö Awēnē nānō pōnō anganca tōmengā ingante nē cæbo bagaboimpa. Apodo adobai mönö Awēnē nānō pōnō anganca Awēnē ingante nē cæcā bagacāimpa. İninqe tōmengā beyæ nē cæmōnaque imōna inte mönatö mīnitö imīnite apænemōna eñente pōnēmīnitapa. ⁶ Tömēmö minte bai cædinque botö mā apænebo ate mīnitö tæcæ eñēmīnitapa. Apodo guiquēnē,

Cõñe bate pæcæimpa, ante æpæ gao caadāni bai cædinque mīnitō īmīnite godōmenque nangūi odōmonte apænecā ēñēmīnitapa. Incæte mōnatō apænemōna beyænque ædō cæte tā bocate bai pæwocaquīmīnii. Wængonguī adocanque nē apænecā beyænque mīnitō tā bocate bai pæwocate ēwocamīnīpa. ⁷ Īnīnque mīnte bai nē apænebo inte botō tōnō Apodo æpæ gao cæte bai nē odōmonte apænecā tōnō mōnatō īñōmō önōmōnaque īmōnapa. Wængonguī tōmenganque, Pæe, ante nē ānongā ingampa. Tōmengā adocanque angā beyænque pæmīnitapa.

⁸ Botō nē apænebo tōnō Apodo nē odōmonte apænecā tōnō mōnatō, Pæcæimpa, ante āanque bai Wængonguī beyænque cæmōnapa. Īnīnque botō nē apænebo īñōmote tōmengā nē odōmonte apænecā īñongante Wængonguī īñōmō, Mīnatō apænegaīnō beyæ æeda, ante eyepæ pōni pōnongā æncæmōnaimpa. ⁹ Mōnatō īñōmō Wængonguī tōnō godongāmæ cæmōni inte mōni nē cæcabo īmōnīpa. Mīnitō guiquēnē Wængonguī quīmīni īnōmīni inte tōmengā gōnea bai pæwocamīni īmīnīpa.

Ayæ adobai tōmengā nānō mænōincō bai īmīnīpa. ¹⁰ Nē ēñente mænongā īñōmō, Wænōmēnæca īnō mænongæimpa, ante cædinque dicaco cō cō cæcampa. Botō īñōmō Wængonguī waadete pōnō cæcā ate nē ēñente mænongā bai adobai bagaiimo inte botō mīnitō weca mā ponte apænebo ēñēmīnitapa. Nōwo guiquēnē botō mænōmāi cō cæte bai mā apænebo ēñēmīni ate wadāni ponte botō cō cædincaa wænōmēnæca mænonte bai cædinque godōmenque odōmonte apænedāni

ēñēmīnīpa. Īnīnque edæ æcänö mänīncaa mænonte
 bai odömöna tömengä töingä mænonte bai nö
 ēñente odömōnte apænequēnengä ingampa.
 11 Waodāni, Dica adocaa wænömēnæca īnō
 mæñongæimpa, ante tāno nāni cō cædinca bai
 Itota Codito adocanque Tānocä ingampa. Īnīnque,
 Wacä tānocä ingampa, ante bai cædinque mīnitō
 ædō cæte wacä miñæ gomīnīi. Īñæmpa, Dica wacaa
 wænömēnæca īnō mænonte bai babaimpa.

12 Ayæ tānoca nāni gö cædinca bai Itota Codito
 Tānocä īñongante mōnitō, Mänīncaa adocaa
 wænömēnæca mæñongæimpa, ante bai cædinque
 odömōnte apænemōnīpa. Nē mænōnāni īñōmō
 oodo ænīnque padata ænīnque dica nāni waa
 pōnī adīnca ænīnque, Quīncamē ēwēnāmaī
 īngūinca, ante ænīnque tömēnāni nāni mænōnō
 bai cædinque pancamōniya nö pōnī odömōnte
 apænemōni ate mōnitō apænedō wido cædāmaī
 īngæimpa. Wadāni guīquēnē awæ ænīnque
 gaguīmæ amīmō ī ænīnque ayawāa amīwæ
 ænīnque quīncoomē ēwēnguīncoo ænīnque
 godō mænōnāni bai cædinque tömēnāni ōnonque
 odömōnte bai apænedānīpa. 13 Edæ Wængonguī
 nānō apænte anguīōnæ īīnque ba ate gonga
 nāni angä nanguī bæcocæimpa. Māniñedē ate
 edæ, Mōnitō æbānō ñōwo odömōnte apænemōnīi,
 ante ñāō gongæ edonque acæimpa. Wængonguī
 māniñedē mōnitō apænedō apænte ancæte ante
 cædinque nē tante bai cæcä ate pancadea æmæwo
 montæ göne ate pancadea ongō æncæcäimpa.

14 Īnīnque, Æcänö mæñongaincō montæ
 gönāmaī ī, ante adīnque Wængonguī eyepæ

pönongä æninque nē mænongaingä wæætē watapæ quēwencæcäimpa. ¹⁵ Wacä guiquēnē tōmengä nänō mænongaincō do montæ gö adinque Wængonguī mänincō nē mænongaingä ingante pönönāmaī incæcäimpa. Incæte mäningä waocä gonga bæcoyömō wodii tao wīnongä bai ömæpocä wæyongante Wængonguī ængä beyænque tōmenganque quēwencæcäimpa.

¹⁶ Mīnitō iñömō, Wængonguī Önōwoca ingante do æninque tōmengä ingante ēwocamompa, ante eñēnāmaī imīnitawo. Wængonguī tæiyæ waēmō oncō bai mönō baō eñamompa, ante eñēnāmaī inte bai cæmīni awædō. ¹⁷ Wængonguī oncō tæiyæ waēmō oncō i iñonte waocä bæ tate wido cæcä adinque Wængonguī näēmæ tōmengä ingante edæ ömæe ēwencæcäimpa. Ayæ adobaī Wængonguī tæiyæ waēmō oncō bai baō eñayöminite waocä wapiticæ odömonte apænecä beyæ mīni godongämæ apænedincabo incæ oda cæte näwæ gomīni adinque nē wapiticæ apænecä ingante Wængonguī adobaī wido cæcæcäimpa.

¹⁸ Mīnitō, Nōwodāni nāni eñēnō ante do nanguī eñēmōnipa, ante pönēmīnitawoo. Iñæmpa mänōmaīnō ante mīnitō nāmā babæ pönēwēninque apænemīni awædō. Nē nō eñēmīni bacæte ante mīnitō ñōwodāni nāni nanguī eñēwēnō ante wido cædinque ömæcamīni badinque nē eñēmīni bacæmīnimpa. ¹⁹ Inguipogaque quēwēnāni nanguī eñēnāni incæte Wængonguī, Önonquedō ante eñēmīni awædō, angampa. Edæ Wængonguī beyæ apænedinque iīmaī ante yewæmongadānimpa. “Ömē nāmā nänō ñönömē incæ waocä näēmæ

wīni wīni dawacā bai nē nanguī ēñēnāni adobaī nāmā nāni ēñēnō beyænque nāēmæ oda cædānīpa, ante cæbopa,” Wængonguī angampa. ²⁰ Ayæ adobaī, “Nē ēñēnāni iñōmō tōmēnāni nāni nanguī ēñēnte pōnēnō incæ idiquibæ impa, ante edæ mōnō Awēnē do ēñēngampa,” ante yewæmonte ongompa.

²¹ Īnīnque, Botō waocā adocanque nānō nē ēmīñæmo inte tobopa, ante ānāmaī incæmīnīpa. Īñæmpa mōnitō waomīni inte tōmāmōni mīnitō beyæ ante cæte quēwēmōnīpa. ²² Botō Pabodobo inōmo incæ Apodo ingā incæ Pegodo ingā incæ mīnitō beyæ ante cæte tōmāmōni quēwēmōnīpa. Inguipo incæ inguipoga ongoncoo incæ mīnitō beyæ ongompa. Mōnō quēwēmāmo incæ mōnō wænguīmāmo incæ mīnitō beyæ ongompa. Nōwopāmo incæ mīimāmo īincayæ ponguīmāmo incæ quīncoomē incæ edæ mīnitō beyæ tōmancoo ongompa. ²³ Ayæ mīnitō wæætē Codito beyænque quēwēmīni īmīnīpa. Codito wæætē Wængonguī beyænque quēwengā ingampa, ante āmo ēñēmaīmīnīpa.

4

Itota nānō nē da godongāimōni inte īimāi cæmōnīpa

¹ Īnīnque mōnatō Pabodobo tōnō Apodo iñōmōnate mīnitō īimāi ante ēñēnguēnēmīni īmīnīpa. Codito tōnō godongāmæ cædinque tōmengā beyæ ante Pabodo tōnō Apodo nē cæda īnāpa. Ayæ godōmenque, Wængonguī tōmengā nānō awēmō ēñēngāinō ante pōnō apæneccā ēñēna

inte tömëna mäninö ante nē apænedā īnāpa, ante ēñenguēnēmīni īmīnīpa. ² Īnīnque Awēnē Wængonguī īīmaī angāmpa. Botō waocā ingante quiēmē pōnō cæbo ænīnque tōmengā botō pōnōnonque entawēnīnque nō pōnente ædæmō aaquēnengā ingāmpa, ante Wængonguī cōwā adīnque, Æbānō botō beyæ wææ aabii, ante apænte angāmpa. ³ Īnīnque mīnitō, Pabodo æbānō cæcāā, ante apænte ancæte ante cōwā amīni incæte botō wædāmaī īmaīmōpa. Nē apænte nāni ānoncabo incæ botō īmote adobaī cōwā adīnque apænte ānāni ēñēnīnque botō wædāmaī īmaīmōpa. Tōmēmo incæ, Æbānō botō cōwē wede pōnente cæbo īmoo, ante ædō cæte nāmā anguīmoo. ⁴ Botō, Tōmēmo wēnæ wēnæ cædāmaī īnōmo īmōpa, ante pōnēmōpa. Incæte, Wentamō mongænāmaī īmōpa, ante ædō cæte botō nāmā anguīmoo. Mōnō Awēnē adocānque botō īmote nē apænte angā ingāmpa.

⁵ Mānīnō beyæ mīnitō, Īnīnque bayedē tōmāā apænte angæīmpa, ante mōnō Awēnē ponganca ee adīnque apænte ānāmaī īedāni. Tōmengā īñōmō waomō mōnō awēmō cægāinō ante, Edonque pōnī acæīmpa, ante ñāō īñōmō māo odōmoncæcāīmpa. Ayæ, Æbānō cæcæboīmpa, ante mōnō ōnōwēnenque pōnengāinō incæ edonque odōmongā gongæ nāwæ acæīmpa. Ayæ, Adocānque æbānō waa cægacāī, ante, Wacā æbānō waa cægacāī, ante watapæ apænedīnque tōmāmō mōnō cægāinō ante Wængonguī pōnō apænecā ēñente mōnō tocæīmpa.

⁶ Īñānāni ēñēedāni. Waocā adocānque ingante, Waingā ingāmpa, ānīnque wacā ingante wīī

piincæminimpa, ante yewæmongatimpa. Īnque botō mīnitō beyæ ante, Mōnatō æbānō cæmōna, ante yewæmontabopa. Mīnitō, Apodo tōnō Pabodo æbānō cæda ĩnaa, ante pōnēnque Wængonguī beyæ nāni yewæmongaĩnonque ante mānĩnonque ěñente cædinque godōmenque cædāmaĩ incæminimpa, ante cætabopa. ⁷ Īñæmpa tōmāmō ōnōmonque ĩñōmonte Wængonguī, Bitō gomonga waēmōmi pōnī ĩmipa, ante dicæ apænte angantawogaa. Bitō entawēnō ĩñōmō tōmēmi ocaidē mā bitō pōnēnō beyænque dicæ entawēmitawogaa. Mōnō Codito adocanque edæ pōnō apænecā ěñente nē ænte entawēmi ĩnōmi inte bitō, Tōmēmoque nāmā beyænque entawēmopa, ante ædō cæte ānewēmii.

⁸ Mīnitō, Eyepæ pōnī do entawēmōnipa, ante baĩ cæmīni awædō. Mīnitō waa quēwenguinque ante do eyepæ ænte baĩ cæmīni awædō. Edæ Pabodoidi mōnitō beyæ cædāmaĩ ĩñōnānite tōmēmōni nāmā beyænque awēnē odeyemōni bamōnipa, ante cæte baĩ cæmīni awædō. Īñæmpa mīnitō nāwangā awēnē odeyemīni bamīni baĩ mōnitō adobaĩ awēnē odeyemōni badinque nanguī tocædōmōnimpa. ⁹ Wæætē Itota nānō nē da godongaincabo ĩñōmōnite Wængonguī incæ, Yæmiñæ pōnī gote nāni wænguinque godānitedō amīni, ante badete tote baĩ odōmongā awædō. Mānōmaĩ cæcā adinque waodāni incæ anquedoidi incæ Wængonguī nānō nē badongaināni tōmānāni mōnitō ĩmōnite adinque badete todānipa, ante awædō.

¹⁰ Edæ mīnitō adobaĩ cædinque ĩmaĩ pīimīni wæmōnipa. Mōnitō Codito beyæ cæyōmōnite mīnitō, Ocai ōmæcamīni inte cæmīnipa, ante

pönēmīnitawoo. Wæætē nāmanque ante pönēninque, Codito nempo quēwēninque mōnitō ocai encamōni inte nanguī ēñēmōnipa, ante tedewēmīni awædō. Ayæ, Pabodoidi aquī pōni iñōnānite mōnitō wæætē tæēmō piñæmōni imōnipa, ante pönēmīni awædō. Wadāni adobaī mīnitō imīnite ante apænedinque, Waīmīni pōni imīnipa, āninque mōnitō imōnite ante wæætē, Ōnōmīnique imīnipa, ante piñānipa.

¹¹ Ayæ mōnitō ñōwo ganca cænguī cænāmaī inte gue ænente awædō. Tepæ bedāmaī inte gæwænte awædō. Weocoo wāā tēincoo mongænte awædō. Ayæ tæi tæi pānāni caate wæmōnipa. Ayæ oncō ōmaamōni inte ¹² mōnitō ōnompoca nanguī cædinque ænte quēwēmōnipa. Wēnæ wēnæ imīnipa, ante piñāni wædinque mōnitō wæætē, Mīnitō imīnite Wængonguī pōnō waadete cæcæcāimpa, ante cæmōnipa. Ayæ togænte pānāni ate wædinque mōnitō wæætē piñāmaī piyænē cæmōnipa.

¹³ Mōnitō imōnite ante apænedinque, Wīwa cædānipa tōō, ante babæ ānāni ēñente wædinque mōnitō wæætē waadete apænemōnipa. Edæ, Ēwēmōimæ gadonguimæ baī imīnipa. Ōmæpocoo wido cæquincoo baī imīnipa tōō, ante piñinque inguipogaque quēwēnāni iñōmō mōnitō imōnite ñōwo ganca cōwē wido cædāni wædōmōni imōnipa.

¹⁴ Mōnitō beyæ cædinque Pabodoidi wæwente quēwēnānipa, ante adinque mīnitō wæætē guingo imonte wæcæmīnimpa, ante botō dicæ mănōmaīnō ante yewæmōmogaa. Wæætē botō wēmīni baī iñōmīnite botō, Mănōmaī cædinque mīni wæquinque impa, ante wææ yewæmōmopa.

¹⁵ Mīnitō imīnite nē aadāni iñōmō diete mīido ganca

mānimpodāni iññānite mōnitō mīnitō mæmpoidi bai imōni guiquēnē mēmōniya pōni imōnipa. Edæ, Itota Codito nempo quēwēninque botō, Itota Codito pōnō cæcā beyænque mōnō watapæ quēwengæimpa, ante apænebo ēñēmīnitapa. Mānōmainō ante apænebo ēñēninque mīnitō mempoga ēñamīni ate botō mīnitō mæmpo bai bagaboimpa. ¹⁶ Mānōmaī beyæ botō mīnitō imīnite waadete apænedinque, Botō mæmpobo cædō bai mīnitō adobaī cæcæmīnimpa, ante nanguī āmopa.

¹⁷ Botō tōmāmæ godinque wayōmō Codito ingante nāni godongāmæ pōnencabo weca wayōmō nāni pōnencabo weca go guidinque iīmaī ante apænebopa. Mōnō Itota nempo quēwēninque nō ēñēninque waa cæte quēwengæimpa, ante odōmonte apænebopa. Mānōmainō ante botō odōmonte apænedō bai botō tōmēmo adodō ēñente quēwēmo abaimpa. Īninque mīnitō, Pabodo mānōmaī quēwengampa, ante ēñencæmīnimpa, ante botō nē waadecā Tīmoteo ingante da godōmo mīnitō weca ponte apænecæcāimpa. Tōmengā iññōmō botō wengā bai inongā inte Codito nempo quēwēninque cōwē nō pōnente cæcā ingampa. Tōmengā mīnitō weca ponte apænedinque, Pabodo nānō odōmonte apænedō bai tōmengā nāmā adodonque ante cōwē ēñente quēwengampa, ante apænecā ēñēninque adodō ante pōnencæmīnimpa.

¹⁸ Pancamīniya, Pabodo wīi pongā awædō, ante, Tōmēmōnique wæætē nē āmōni incæmōnimpa, ante botō imote pīinte tedewēmīnipa. ¹⁹ Incæte mōnō Awēnē Ao angā ate botō oo poncæboimpa.

Ponte adinque botö, Tömëmönique në ämöni incæmönimpa, ante në tedewëmini æbänö tedewëminii, ante änämaï incæboimpa. Wæætë adomïni mïni tæï piñænö ante cōwä adinque apænte ancæboimpa. ²⁰ Wængonguï Awënë Odeye nempo në quëwëmö iñömö wïi önonque mönö tedequïnö beyænque quëwëmompä. Wæætë edæ tæï piñænte mönö quëwenguïnö ante mönö tömengä nempo quëwëmompä. ²¹ Mïnitö æbänö cæmïni ate mïnitö weca ponguïmo. Edæ mïni cædinö adinque botö panguënëmo inguïmo, ämïnitawo. Wæætë waadete pönëninque ædæmö cæquënëmo inguïmo, ämïnitawo.

5

Në wïwa towengä ingante apænte angæïmpä, ante

¹ Edæ, Në wïwa towengä incæ coodintoidi nãni pönencabo tönö godongämæ ongongampa, ante tededäni eñentamönipa. Mïnitö weca ongongä adocanque tömengä wæmpo nänöogængä incæ manguïwengampa töö. Iñæmpä Wængonguï ingante në eñënämaï inãni incæ mänömaï wënæ wënæ cædämaï iñönãni mïnitö weca ongonganque do cæcä apa cæmïnii. ² Në wïwa towengä tönö godongämæ ongömïni incæte mïnitö, Tömëmönique waa cæmöni imönipa, ante tedewëmini awædö. Incæte Ca ca wæmïni baï waa incædönimpa. Në wïwa cæcä ingante, Mönitö weca ongönämaï gobäwe, ante da godömïni gocä baï waa incædönimpa. ³ Botö guiquënë nänënë quëwëmo incæte mïnitö weca owote baï önöwënenque pönëmo imopa. Ìninqe mïnitö weca

owote bai botö nē wiwa cæcä ingante do apænte ämopa. ⁴ Minitö Awënē Itota emöwo apænedinque godongämæ pöñömini botö nänënë quëwëmo incæte adoyömö owote bai pönencæboimpa. Ayæ Awënē Itota tæi piñænongä inte minitö tönö adoyömö ongoncæcäimpa. Ìinque minitö iimaï cæedäni. ⁵ Awënē nänö ponguïönæ iñedë nē wiwa cædongä tömengä önöwoca quëwencæcäimpa, ante iimaï cæedäni. Tömengä nänö wiwa ëñayö ewente bacæimpa, ante cædinque minitö tömengä ingante Tatäna nempo pædæ godömini æncæcäimpa.

⁶ Minitö, Waa imöni imönipa, ante tededinque wiwa tedewëminipa töö. Edæ dodäni nani yewæmongainö ante adämaï inte bai tedewëminipa. “Päo tömäo yedæ æmpoquinque wædænque da wënäni” bai minitö adobai adocanque wiwa cæcä ingante mini oda cæquinque ee amini ongongampa. ⁷ Mini pönencabo waëmö pönï mini entawenguinque päo yedæ æmpoqui wido cæte bai cædinque nē wiwa cædongä ingante da tadömini gocæcäimpa. Edæ mönö Codito iñömö wiwa mönö cædinö ante ñä mënongacæte ante nämä wepæ godongacäimpa. Edæ dodäni, Nē wænonguëngä wænönämaï inte wodo pänta gocæcäimpa, ante, Patowa, ante codotedo nani nē wænongaingä bai mönö Codito iñömö adobai inongä inte wængacäimpa. ⁸ Ìinque mönö päo yedæ æmpoqui ömæmö i cænte bai cædinque wiwa mönö cædö ante wido cædinque mönö piinte cædämaï inte waa cæte quëwengæimpa. Ayæ ææmæ watapæ bete bai cædinque, Quinö näwangä pönï i, ante Ao ante æninque mönö nö pönente quëwengæimpa.

9 Nē wīwa towēnāni tōnō godongāmæ cædāmaī iedāni, ante botō cadota ante do yewæmōmo amīnitawo. 10 Mānōmainō ante yewæmōninque botō, Inguipogaque quēwēnāni tōnō godongāmæ cædāmaī iedāni, ante dicæ antabogaa. Īñempa wīwa towēnānique, wacā quī nē æīnente wædānique, wacā quī nē ō ænānique inguipoga quēwēnānipa. Ayæ, Wængonguī impa, ante badōninque nē ædæ wæænte quēwēnānique mānimpodānique inguipoga quēwēnānipa. Īninque ædō cæte tōmēnāni weca cædāmaī inguū. Edæ inguipo ēmō cæte gote bai tōmēnāni weca ongōnāmaī inguū.

11 Wæætē māninō ante yewæmōninque botō, Mīni pōnencabo incæ adocanque wīwa cæcā adinque mīnitō tōmengā tōnō godongāmæ cædāmaī iedāni, ante wææ āmopa. Edæ, Nē pōnengā incæ wīwa towengantawo. Nē pōnengā incæ wacā quī æīnente wæcantawo. Wængonguī impa, ante badonte nē pōnengā ædæ wæængantawo. Wacā ingante, Wēnæ wēnæ ĩmipa, ante angantawo. Tī nāmæ bete nē pōnengā incæ quidi quidi dowængantawo. Wacā quī æncæte ante babæ cædinque ō ængantawo. Īninque tōmengā, Nē pōnēmo ĩmopa, ānongā incæ mānōmaī wīwa cæcā adinque mīnitō tōmengā tōnō godongāmæ cædāmaī inte godōmenque tōmengā tōnō godongāmæ contate cænāmaī iedāni, ante botō wææ ancæte ante āmopa.

12 Mīnitō Codito nempo mīni quēwencabo incæ nāēmæ apænte ānāmaī ĩmīni inte oda cæmīnipa. Wadāni ĩnānite Codito nempo quēwēnāmaī

iñönänite botö, Tömänäni æbänö wænæ wænæ cædänii, ante ædö cæte apænte anguimoo.
 13 Wængonguinque tömənäni inänite apænte ancæcäimpa. Incæte mīni cabo incæ adocanque wiwa cæcä adinque mīnitö tömēmīni, Mönitö weca ongönāmaï gobāwe, ante da tadömīni tao gocæcäimpa.

6

Në pönənāmaï ingä apænte ancæcäimpa, ante änāmaï ðe

¹ Mīni pönencabo iñömīnite adocanque bitö imite wænæ wænæ cæcantawo. İninqe bitö, Tömengä ingante apænte ancædänimpa, ante cædinque eñənāmaï inäni weca ædö cæte ænte gobii. Wæætē Wængonguï quīnāni inänite angä eñeninque tömənäni wæætē, Tömengä æbänö wænæ wænæ cæcää, ante apænte adinque nö ancædänimpa. ² Edæ mönö Wængonguï quīmö iñömö edæ, Inguipoga tömāmæ quëwənäni æbänö wænæ wænæ cædänii, ante në apænte anguimö imompa. Incæte mīnitö, Mänömaï cæcæmönimpa, ante eñənāmaï inte bai cæmīni awædö. Tömāmæ quëwənäni inänite në apænte anguimīni inte mīnitö ñowo wædænque mīni apænte anguënənö incæ quīnante änāmaï imīni. ³ Mönö iñömö Wængonguï anquedoidi inänite në apænte anguimö inömöimpa, ante eñənāmaï imīnitawo. Mänināni inänite në apænte anguimö inömö inte mönö pönencabo ñowo mönö wædö ante mönö godömenque apænte angæimpa, ante pönēmīniyaa.

⁴ Codito ingante mīni godongāmæ pönencabo incæ mīni wædö ante apænte ancædänimpa,

ante mīnitō ædānidō inānite āmīni apænte
 ānāni. Iñæmpa, Ōnōnānique inānipa, ante mīni
 ānōnāni incæ mānīnō ante nē apænte ānāni
 badānitawo. ⁵ Mīnitō guingo imonte mīni
 wæquinque cæmīnipa, āmo ēñēmaimīnipa. Nāna
 pōnencaya incæ nāēmæ wæætedō wæætē āna
 wædinque mīnitō, Mōnō pōnencabo incæ æcānō
 nē nō ēñēnongā inte apænte anguingāā, ante
 adinque tōmengā ingante anguēnēmīni imīnipa.
 Iñæmpa mīnitō weca nē nō ēñengā adocanque dæ
 angantawogaa. ⁶ Wæætē nāna pōnencaya incæ
 nāēmæ pīinīnque adocanque, Botō beyæ apænte
 ānīnque īngā ingante pancædānimpa, angampa.
 Ayæ godōmenque wēnæ wēnæ cædinque tōmengā
 nānō tōniñacā ingante nē pōnēnāmaī ināni weca
 ænte godinque, Apænte ānīnque pancæmīnimpa,
 angā pānānipa.

⁷ Iñæmpa mīni pōnencabo incæ nāēmæ pīinīnque,
 Apænte ante pangæimpa, ante dobæ oda cæmīnipa
 tōō. Edæ wacā wīwa cæcā ate wædinque bitō
 wæætē piyænē cæbi waa imaimpa. Tōmengā
 babæ wapiticæ ānīnque ō ængā wædinque bitō
 piyænē cæbi waa imaimpa. ⁸ Incæte piyænē
 cæquēnēmīni incæ mīnitō wæætē babæ cædinque ō
 æmīni awædō. Wacā ingante wīwa cæmīni awædō.
 Mānōmaī cædinque mīnitō mīni pōnencabo incæ
 wæætē godō wæætē godō wīwa cæmīnipa tōō.

⁹ Wīī ēñente cædāni iñōmō Wængonguī Awēnē
 Odeye nempo cōwē guidāmaī inguināni inānipa,
 ante mīnitō iñōmō ēñēnāmaī inte baī cæmīnipa
 tōō. Mānōmainō ante pōnēnīnque mīni oda
 cæquinque ī apa cæmīni. Ñōwo godōmenque

ämo eñeedäni. Pancadäniya towente cædänipa. Pancadäniya guiquënë, Wængonguï impa, ante nani badöniñömö gäänë ædæ wæænänipa. Pancadäniya guiquënë nänöogæ inämaï iñongante godö guëa möwänänipa. Pancadäniya guiquënë nana onguïñæncaya incæ nana gæncaya inte bai cædinque guëa monte quëwänapa. ¹⁰ Pancadäniya guiquënë awëmö ænänipa. Pancadäniya guiquënë wacä mäincoo ante æinente wædänipa. Pancadäniya guiquënë ti nämæ bete quidi quidi dowænänipa. Pancadäniya guiquënë wacä ingante, Bitö wænæ wænæ imipa töö, ante püinque babæ änänipa. Pancadäniya guiquënë babæ apænedinque ö ænänipa. Mänömaï wiwa cædönäni inte tömënäni Wængonguï Awënë Odeye nempo cöwë guidämaï inguïnäni inänipa, ämo eñëmaïminipa. ¹¹ Mini pönencabo incæ pancaminiya mänömaï ingaïmini inte ñöwo iñömö æbänö iminii. Edæ mönö Awënë Itota Codito emöwo beyænque Wængonguï Önöwoca pönö ñä mënongacä ate minitö tæiyæ waëmö ewocate quëwëmini adinque Wængonguï, Botö ayömo minitö waa cæmini iminipa, angampa.

Baonga quëwëninque mönö tæiyæ waëmö entawente quëwengæimpa

¹²“Botö cæinënouque ante cæbo incæ Wængonguï wææ änämaï ingampa,” ante apænedänipa. Incæte botö cæinënouque ante quëwëmo bai wiï botö waa quëwenguinque incædömoimpa. Botö cæinënouque ante cæbo incæ Wængonguï wææ änämaï ingampa, ante nani änö iñömö edæ näwangä impa. Incæte botö cæinënouque ante cæbo bai botö ñä cæyænte

baī wæwenguēnēmo inte awædō. ¹³ Ayæ cænguī iñōmō. “Mōnō cæncadē guiquinque cænguī æmompā. Ayæ adobaī mōnō cæncadē cæī cænguī beyænque ēnēmompā,” ämīnitawo. Iñæmpā cænguī incæ cæinca incæ, Idæwaa impā, ante Wængonguī wo ēwencæcäimpā. Ayæ adobaī mōnō baō iñōmō wīi towenguinque beyæ ēñamompā. Wæætē mōnō Awēnē beyænque mōnō baō ēñate quēwēmompā. Ayæ mōnō baō beyæ ante mōnō Awēnē pō guicā ate tōmengä tōnō äawocaque baī ēwocamompā. ¹⁴ Iñinque edæ mōnō Awēnē ingante Wængonguī tæēmō piñæninque angä ñāni ömæmongä baī mōnō imonte adobaī tæēmō piñæninque angä ñāni ömæmonguīmō imompā.

¹⁵ Edæ, Codito quī, ante mōnō baō incæ godōmō ængä ate mōnō tōmengä baō baī ēñamompā, ante ēñēnāmaī imīnitawo. Iñinque Codito baō baī ēñabo inte botō iñōmō edæ onquiyængä mäincoo beyæ ante nē towente quēwengä tōnō edæ ædō cæte godō monguimoo. ¹⁶ Edæ, Æcänō mänōmaī godō mōna tōmengä nē tote quēwengä tōnō adocanque baī bacampa, ante ēñēnāmaī imīnitawo. Edæ, “Mēnaa iñina incæ tōmēna wæætē nāna gæncaya mōninque adocanque baī bacædaimpā,” ante apænete yewæmonte ongompā. ¹⁷ Ayæ mōnō Awēnē nempo quēwengä tōmengä iñōmō mōnō Awēnē tōnō äawocaque baī ēwocacampā cæminii.

¹⁸ Æcänō godō towēna tōmengä nāmā baō cædingä inte nāmā baō nānō wæwenguinque wēnæ wēnæ cæcampā. Wæætē yabæque mōnō wēnæ wēnæ cædō beyæ mōnō baō ædō cæte wæwenguīi. Mänōmaī iñinque mīnitō iñōmō wodii

wīnonte towēnāmaī quēwēedāni. ¹⁹Edæ Wængonguī tōmengä Tæiyæ Waēmō Önōwoca ingante mīnitonga da pōnongä pō guite owocampa. Īnīnque mīnitō, Botō baō tōmēmo quī ēñabopa, ante ædō cæte ämīnii. Īñæmpa Wængonguī Önōwoca tæiyæ waēmō oncō bai ēñate apa ānewēmīnii. ²⁰Wængonguī nangūi pōni godonte ængä beyænque mīnitō baō tōmengä quī ēñapa. Mānōmaī beyæ mīnitō, Tōmānāni Wængonguī ingante waa ate ēñencædānīmpa, ante cædinque mīnitō baonga quēwēnīnque edæ waa cæedāni.

7

Nāna gæncaya inōna inte iūmaī cæbainapa

¹ Nōwo iñōmō mīni wædō ante yewæmōmīni ænte adīnque botō iūmaī ämopa. Onguīñængä iñōmō onquiyængä ingante mōnāmaī ingä waa tobaimpa. ² Incæte, Wīi towēinente wæcæcäimpa, ante cædinque onguīñænāni tōmānāni, Botō nānōogængä incæcäimpa, ante mōnāni waa imaimpa. Ayæ onquiyænāni adobai tōmānāni, Botō nānōogængä incæcäimpa, ante mōnāni waa imaimpa. ³ Onguīñængä iñōmō tōmengä nānōogængä añongante, Botō nānōogæmi imipa, ante Ao ānīnque ääodenque moncæcäimpa. Ayæ onquiyængä adobai, Botō nānōogæmi imipa, ante ānīnque tōmengä nānōogængä añongante ääodenque moncæcäimpa. ⁴ Monte ate nānōogængä tōnō adocanque bai ba adīnque onquiyængä wæætē, Onguīñængä quī, ante ēñadinque, Tōmēmo baonque ēñabopa, ante ædō cæte anguingä. Ayæ adobai onguīñængä wæætē, Onquiyængä

quī, ante eñnadinque, Tömëmo baonque eñabopa, ante ædö cæte anguingää. ⁵ Nänöogængä angä eñnente edæ Baa änämaï. Pancaguënëa Wængonguï ingante nanguï apæ necæte ante guëa Ao äninque nänëneto nänënë wantæ iñö möninqe idæwaa. Edæ, Tatäna angä wacä ingante towëinente wæcæ wæ, ante wææ cædinque adodë iñömö wæætë moncædaïmpa.

⁶ Incæte mänömaï äninque botö, Minitö botö änö bai cöwë cæcæminïmpa, ante wææ änämaï imopa. Wæætë, Minitö mänömaï cæmini waa imaimpa, ante mäninonque ante apænebopa. ⁷ Onguïñænäni tömänäni botö bai wëmö cædäni quëwënäni bai waa incædönïmpa, ante pönëmopa. Incæte Wængonguï pancadäniya inänite pönö apænedinque, Bitö mönämaï inte adobique wëmö cæte botö beyæ cæcæbiïmpa, äninque wadäni inänite, Bitö mömi ate mïna gæncaya botö beyæ cæcæminaimpa, angampa.

⁸ Botö, edëningä ingante apænedinque ayæ owæmpoingä ingante apænedinque, Botö bai wëmö cæbi waa imaimpa, ämopa.

⁹ Incæte adocanque, Onquiyængä ingante cöwë moncæboïmpa, ante wæcä adinque botö, Bitö cöwë moncæbiïmpa, ämopa. Edæ tömengä towëinente wädämaï incæcäïmpa, ante wææ äninque botö, Tömengä godömenque waa quëwencæcäïmpa, ante ee abo moncæcäïmpa.

¹⁰ Do möningä ingante edæ botö iïmaï ämopa. Æ, wadö ämopa. Wïi botö ämopa. Mönö Awënë incæ iïmaï angampa. Onquiyængä incæ tömengä nänöogængä ingante ëmö cæte godämaï incæcäïmpa, angampa. ¹¹ Incæte ëmö cæte gocä

īninqe wæætē adodō pōninqe adocā ingante mongā waa īmāimpa. Wæætē adodō pōnāmaī ingā īninqe tōmengā ee quēwēninqe wacā ingante cōwē mōnāmaī incæcāimpa. Ayæ onguiñængā incæ nānōogængā ingante pāmænte godāmaī incæcāimpa, ante mōnō Awēnē angampa.

¹² Wamīni īmīnite guiquēnē mōnō Awēnē ānāmaī īñongā botō wæætē īmaī āmopa. Onguiñænganque nē pōnengā inte, Botō nānōogængā pōnēnāmaī ingā incæ botō tōnō ee quēwengampa, ante adinqe tōmengā nānōogængā ingante pāmænāmaī incæcāimpa.

¹³ Onquiyænganque nē pōnengā inte, Botō nānōogængā pōnēnāmaī incæ botō tōnō ee quēwengampa, ante adinqe tōmengā nānōogængā ingante pāmænāmaī incæcāimpa.

¹⁴ Onquiyænganque nē pōnengā īñongante tōmengā adocanque nānō pōnēnō beyænque Wængonguī, Mīna gæncaya botō quīmīna īmīnāpa, ante onguiñængā ingante edæ do ængampa. Ayæ adobāī onguiñænganque nē pōnengā īñongante tōmengā nānō pōnēnō beyænque Wængonguī, Mīna gæncaya botō quīmīna īmīnāpa, ante onquiyængā ingante adobāī do ængampa. Wængonguī mānōmaī cæcā beyænque mīnatō wēnāni nāni waa quēwenguīnque Wængonguī quīnāni badānīpa. Wængonguī wīī mānōmaī cæcā baī mīnatō wēnāni īñōmō Wængonguī quīnāni īnāmaī inte nōwadāni baī nānēnē pæcædōnānīmpa.

¹⁵ Bitō adobique nē pōnēmi īñōmite bitō nānōogængā pāmænte gocā wædinque ee abi gocæ. Mānōmaī ēmō cæte gocā adinqe bitō tōmengā ingante nānōnāmaī inte baī badinqe ee quēwencæbiīmpa. Edæ, Piyænē cæte quēwēedāni,

ante Wængongui tömämö imonte aa pegacäimpa. ¹⁶ Bitö onquiyæmi tömëmi waa cæbi adinque bitö nänöogængä wabänö waa pönente quëwëmaingä, ante ædö cæte ëñëmii. Edæ onguiñæmi adobaï tömëmi waa cæbi adinque bitö nänöogængä wabänö waa pönente quëwëmaingä, ante ædö cæte ëñëmii.

¹⁷ Incæte mönö Awënë, İmaï cæe, angä ate ëñente wædinque bitö tömengä nänö änönonque ante cæte quëwencæbiimpa. Ayæ, Æbänö botö nänöogængä äayömo mönö Awënë aa pecantapa, ante pönëninque bitö mäniñedë bitö nänöogængä äagai baï adobi inte quëwencæbiimpa. Botö iñömö Codito ingante nani pönencabo wayömö nani godongämæ poncabo wayömö nani godongämæ poncabo weca gote apænedinque, Mänömaï cæedäni, ante tömänäni inänite ante apænebopa.

¹⁸ Onguiñæmi imi do ëö togænimi iñömite Wængongui aa pecantawo. İninque bitö, Bagäacä baï babote, ante cædämaï incæbiimpa. Æö togæmi inte ee quëwëe. Wæætë ëö togænämaï iñömite Wængongui aa pecantawo. İninque bagäabi inte ee quëwëe. ¹⁹ Edæ ëö togæmö incæ bagäamö incæ waomö önömonque imompa. Wii mäninö beyænque waa quëwëmö imompa. Wæætë Wængongui nänö wææ angainö ëñente beyænque waa quëwëmompä. ²⁰ İninque, Æbänö engëñömo Wængongui aa pecantawoo, ante pönëninque bitö adobi inte cöwë quëwëe. ²¹ Bitö wacä beyænque cæte në quëwëmi iñömite Wængongui bitö imite aa pecantawo. İninque bitö në cæbi inte piyænë cæte wædämaï incæbiimpa. Incæte bitö imite ñimpo cædinque, Abæ

tawænte goe, angä eñëninque ee goe.

²² Waocä beyænque cæte nē quēwēmi iñōmite mōnō Awēnē aa pecantawo. Īninque mōnō Awēnē incæ pōnō ñimpo cædinque, Abæ tawænte goe, angä eñëninque ee gote bai ēwocabipa. Wæætē bitō waocä beyænque nē cæbi ināmaī iñōmite mōnō Awēnē aa pecantawo. Īninque Codito nē aa pete ængä beyænque bitō cæte nē quēwēmi babipa. ²³ Edæ Wængonguī tōmengä nānō Tæiyæ Waēmō Wengä ingante godongä beyænque mōnō wæætē tōmengä quīmō bagamōimpa, ante pōnëninque mīnitō wæætē waocä beyænque nē cæte quēwēmīni badāmaī iedāni. ²⁴ Īñānāni ĩmaī ante cædāni. Botō Wængonguī Awēnē nempo quēwëninque tōmengä nānō ānonque eñente cæcæboimpa, ante cædinque mīnitō Wængonguī nānō aa peyedē mīni ēgaī bai adomīni inte quēwēedāni.

²⁵ Ayæ, Mōnāmaī ināni æbānō quēwenguënēnāni ināni, ante mōnō Awēnē angampa diyæ eñenguīmoo. Incæte Wængonguī waadete pōnō apæncä eñëninque botō nē eñënōmo bagaimo inte mā pōnëninque āmo eñëmaīmīnīpa. ²⁶ Mōnō wæwenguīmāmo oo pōnī impa, ante pōnëninque bitō, Nōwo botō nānōogængä ingante æbānō ēate quēwēmoo, ante pōnëninque ñōwo bitō ēadō bai adobi inte cōwē quēwenguënēmi imīpa, ante pōnēmopa. ²⁷ Onguīñæmi eñēmi, Bitō nānōogængä ingante do mōmitawo. Īninque, Pāmæncæboimpa, ante ānāmaī iē. Wæætē wacä ingante āmopa. Bitō wēmō cæbitawo. Īninque, Botō nānōogængä, ante diqui diqui mīnāmaī ĩmi waa imaimpa. ²⁸ Incæte

ñowo mömi incæ wænæ wænæ cædāmaī inte mōmipa. Ayæ baquecā adobaī do mongā incæ wænæ wænæ cædāmaī inte mongampa. Incæte æcānō mōna tōmengā inguipoga quēwente nānō caate wæquinque mongampa. Mānōmainō ante yewæmōninque botō, Mīnitō caate wædāmaī incæmīnimpa, ante wææ āmopa.

²⁹ Īñānāni, Nōwopāmo wīi wantæpiyæ ingæimpa, ante wædinque āmopa. Edēningā nānō pōnēnō baī nē manguiwengā incæ adobaī pōnengā baī waa ĩmampa. ³⁰ Æcānō Ca ca wæda tōmengā ĩñōmō wīi wæcā baī bacā ĩninque waa ĩmampa. Æcānō Ca ca toda tōmengā wīi tocā baī bacā ĩninque waa ĩmampa. Æcānō godonte æna tōmengā ōmæpocā baī bacā ĩninque waa ĩmampa. ³¹ Inguipoga mōnō cædō ante æcānō cæda tōmengā mānīnō ante ānāmaī inte baī cæcā ĩninque waa ĩmampa. Edæ inguipoga quēwēninque mōnō cædō oo pōnī ēwente baquīnō anguēnē.

³² Edæ mīnitō, Æbānō cæquīmoo, ante wædāmaī incæmīnimpa, ante botō ĩmaī ante wææ āmopa. Nē wēmō cæcā guiquēnē, Æbānō cæbo ate mōnō Awēnē waa toquingā, ante pōnēninque tōmengā mōnō Awēnē beyænque ante quēwengampa. ³³ Do mōingā guiquēnē inguipoga nānō quēwenguīnō ante pōnēninque, Æbānō cæbo ate botō nānōgængā waa toquingā, ante wæcampa. ³⁴ ĩninque tæcæ tæcæ pōnente cæcampa. Onquiyængā guiquēnē owæmpoingā ingā incæ baquecā ingā incæ mōnō Awēnē beyæ ante pōnēninque, Æbānō botō baō tæiyæ waēmō ēñaquīmoo, ayæ, Æbānō botō ōnōwoca tæiyæ waēmō ēwocaquīmoo, ante cæcampa. Do mōingā guiquēnē, Æbānō cæbo ate botō

nänöogængä waa toquingä, ante inguipogaque nänö quëwenguinö ante wæcampa.

³⁵ Mäninö ante botö wii minitö iminite wææ cæcæte ante ämopa. Wæætë minitö mini watapæ quëwenguinque ante botö, Mönö Awënë ingante æmæ pönënamaï inte nöingä cæte quëwencæminimpa, ante ämopa.

³⁶ Onguiñængä adocanque guiquënë, Botö wengä baquécä do picængä bacampa, ante adinque botö tömengä ingante godonguënëmo imopa, angä ininque tömengä nänö änö bai cædinque ee godongä moncæcäimpa. Edæ mänömaï godöninque tömengä wii wënæ wënæ cæcä ingampa. ³⁷ Wacä guiquënë mimöno ædæmö nö pönëninque, Botö wengä baquécä picængä bacä incæte botö piyænë cæte godönämaï incæboimpa, angampa. Ininque wadäni tömengä ingante wææ änämaï iñönäni tömengä, Tömëmoque botö äninö bai cæcæboimpa, ante në ëñente pönëninque godönämaï ingampa. Tömengä adobai waa cæcampa. ³⁸ Ininque tömengä wengä baquécä iñongante edæ, Moncæcäimpa, ante në godongä guiquënë waa cæcampa. Wæætë wacä, Mönämaï incæcäimpa, ante wii godongä guiquënë tömengä godömenque waa cæcampa.

³⁹ Nänöogængä ayæ miiingä quëwëñongante onquiyængä iñömö tömengä tönö cöwë quëwenguëngä ingampa. Wæætë nänöogængä wængä owæmpote ate tömengä abæ tawænte bai adocanque quëwengampa. Do owæmpoingä inte, Wacä ingante möinëmopa, angä ëñëninque minitö, Tömëna mönö Awënë nempo nänä quëwencaya

inapa, ante adinque möinente nänö wædö ante ee godömini moncædaimpa. ⁴⁰ Incæte botö, Owæmpoingä ee wëmö cædinque godömenque watapæ quëwëmaingampa, ante pönëmopa. Edæ Pabodo imo Wængonguï Önöwoca tönö ääwocaque bai ewocabo inte mänömainö ante pönëmopa.

8

Mönitö wængonguï cænguï, ante wadäni näni cönöni ante

¹ Wadäni, Mönitö wængonguï cænguï impa, ante näni cönönincoo ante adinque mñitö, Önonque cænguï impa, ante abaimpa, ämñitawo. Näwangä tömämö mñi änö bai do ëñëmopa. Incæte, Tömëmoque do ëñëmopa, ante nē angä iñömö tömengä nämä ængö cæte bai cædinque wadäni inänite piinte bai cæcampa. Wæætē nē waadecä guiquënë wadäni inänite ængö cæte bai cædinque tömënäni inänite waadete cæcampa. ² Waocä, Tömëmo do ëñëmopa, ante nē änewengä guiquënë tömengä nö nänö ëñenguënënö ante ayæ ëñënämaï inte cæcampa. ³ Wæætē Wængonguï ingante nē waadedäni inänite do againgä inte tömengä tömënäni inänite pönengampa.

⁴ İninqe, Mönitö wængonguï cænguï impa, ante wadäni näni cönönincoo ante ñöwo apænebo ëñeedäni. Tömënäni näni, Mönitö wængonguï impa, ante näni cönöninca önoncaque impa, ante mönö do ëñëmopa. Ayæ adobai, Näwä Wængonguï adocanque pönï ingampa, ante do ëñëmopa. ⁵ Wængonguïdi näni änönäni incæ awënëidi näni änönäni incæ nangui pönï inänipa. Näwangä impa.

Incæte tōmēnāni, Wængonguūidi inānīpa, ante nāni ānōnāni inguipoga incæ öönædē incæ ongōnāni incæte, ⁶ Wængonguūi mōnō Wæmpocā iñōmō adocanque pōni ingampa. Öönæ incæ inguipo incæ öönædē ongoncoo incæ inguipoga ongoncoo incæ tōmancoo incæ tōmengā adocanque badonte aacā beyænque edæ ongoncoopa. Ayæ adobai mōnō tōmengā nempoque quēwēmompā. Ayæ Itota Codito mōnō Awēnē adocanque pōni ingampa. Tōmengā tōnō godongāmæ cædinque Wængonguūi tōmancoo badongacāimpa. Adocā Codito tōnō godongāmæ cædinque Wængonguūi pōnō cæcā ate mōnō quēwēmompā.

⁷ Mānīnō ante pancamonga guiquēnē ēñēmompā. Pancadāniya guiquēnē nē pōnēnāni incæ mānīnō ante ēñēnāmai inānīpa. Iñāni Codito ingante tæcæ pōnēnāni iñōmō tōmēnāni wēēnēñedē, Mōnitō wængonguūi impa, ante badonte cōnonte ædæ wæænte cægāināni inānīpa. Ñōwo iñōmō tōmēnāni Codito ingante tæcæ pōnente ate, Wadāni wængonguūi cænguūi incæ cæninque wentamō mongænte wæcæ wæ, ante guīñente wædāni incæte do edæ cænānīpa. Mānōmai Codito ingante æmæ pōnēnāni inte tōmēnāni wadāni nāni wængonguūi cænguūi cæninque nāmanque nāni æmæ pōnēnō beyænque nāmā apænte do wentamō entawēnāni inānīpa. ⁸ Incæte cænguūi önonque iñonte mōnō cænāmai imō beyænque ædō cæte wīwa entawenguūi. Wæætē mōnō cæmō beyænque ædō cæte waa entawenguūi. Edæ mōnō imonte cænguūi beyænque Wængonguūi dicæ waa aquingāa.

⁹ Wængonguūi wææ ānāmai ingā adinque mīnitō

do cæmīnitawoo. Īñæmpa mänōmaī cæmīni adinque wadāni nē æmæ pōnēnāni adobaī cænāni ininque tōmēnāni tee tēwate baī oda cæbainānīpa. Mänōmaī impa, ante pōnēninque mīnitō, Oda cædāmaī incædānīmpa, ante cædinque ee cænāmaī imæwedāni āmopa. ¹⁰ Edæ, Mōnitō wængonguīdi oncō impa, ante tōmēnāni nāni ānincōnē bitō nē ēñēmi inte go guīdinque cængōmitawo. Īñæmpa bitō mänōmaī go guī cængōmi adinque wacā nē æmæ pōnengā guīquēnē bitō cæbaī adobaī do cædinque nāmā apænte ānāmaī inte tōmengā nānō oda cæquinque do go guīite cæmaingampa. ¹¹ Codito tōmāmō beyæ wæninque nē æmæ pōnengā beyæ adobaī wængacāimpa cæbii. Bitō tōmēnāni nāni wængonguī oncō ante, Ōnonconque impa, ante nē ēñēmi inte do guīite cæmi beyænque bitō tōniñacā nē æmæ pōnengā ĩñongante wapiticæ māobi oda cæte wæwente bacampa tōō. ¹² Mänōmaī cædinque mīnitō tōniñadāni ĩnānite mīnitō waadedāmaī inte wēnæ wēnæ cæmīnīpa. Tōmēnāni nāni nāmā apænte æmæ pōnēnō ante wido cæte baī cædinque mīnitō mōnō Codito ingante do wiwa cæmīni ĩmīnīpa. ¹³ ĩninque botō cæmo beyænque botō tōniñacā oda cæcā adinque botō, Tōmengā oda cædāmaī incæcāimpa, ante cædinque baō incæ cōwē cænāmaī incæboimpa.

9

Codito nānō da godongaināni ūmaī cæquēnēnāni ĩnānīpa

¹ Botō Pabodobo æbānō ĩmoo, ante mīnitō æbānō ante pōnēmīni. Edæ, Botō Itota nānō

nē da godongaīmo īmopa. Tōmengā botō īmote pōnō ñimpo cæcā beyænque quēwēmopa. Mōnō Awēnē Itota ingante do agaīmo īmopa. Mīnitō guiquēnē, Pabodo mǎnōmaī ingampa, ante pōnēmīniyaa. Ayæ mōnō Awēnē nempo quēwēninque botō Pabodobo tōmengā beyæ apænebo ēñēmīni inte mīnitō wæætē, Pabodo apæneca beyænque mōnitō nē pōnēmōni īmōnipa, ante pōnēmīniyaa. ² Wadāni guiquēnē, Pabodo ingante Awēnē Itota da godōnāmaī ingacāimpa, ānānitawo. Tōmēnāni mǎnōmainō ante tedewēnāni incæte mīnitō guiquēnē, Pabodo ingante mōnō Awēnē Itota nāwangā da godongacāimpa, ante apænequēnēmīni īmīnipa. Edæ botō pōnō apænebo beyænque mīnitō wede pōnēninque mōnō Awēnē nempo quēwēmīnipa, ante edonque abaimpa.

³ Pancamīniya botō īmote apænte ancæte ante cæyōmīni botō nāmā wææ cæcæte ante īīmaī āmopa. ⁴ Mōnatō apænemōna ēñēmīni incæte mīnitō iñōmō, Mīnatō eyepæ cæmīnapa diyæ cænguī tōnō bequī ænguīmīnaa, ante wææ ante baī tedemīni awædō. ⁵ Wadāni mōnō Awēnē Itota nānō nē da godongaināni iñōmō nāna gæncaya nāna gæncaya godānipa. Mōnō Awēnē tōniñadāni adobaī Pegodo adobaī tōmēnāni nāna gæncaya nāna gæncaya godānipa. Mōnatō īmōnate guiquēnē mīnitō, Mīnatō godinque nānōogængā ænāmaī inte goeda, ante wææ ante baī tedemīni awædō. ⁶ Wadāni ōnompoca cædāmaī inte quēwēñōnāni botō tōnō Bedēnabee adomōnaque ōnompoca mōna cædō beyænque ænte quēwenguēnēmōna īmōnatawo.

⁷ Tontadoidi guiquënë dicæ tömënäni nämä nāni godonte æinta beyæ quëwënāniyaa. Ayæ æcänö yowementacoo mingä pæ inca ate nē mīningä iñömö ædö cæte yowepæ ænte bedāmaï ingu-ingää. Edæ dobæ ade becampa. Cænīnāni nē aacā guiquënë dicæ goömæ yopænte ænāmaï ingu-ingää. Edæ do yopænte ænte becā apa ānewēmīni.

⁸ Mänömainö ante apænedinque botö woadānique nāni änönö ante wīi āmopa. Wæætē Wængonguī nänö wææ angainö ante mänīnonque ante āmopa. ⁹ “Wagada onguīñängä nē cæcā inte tömentapo æ yacæimpa, ante āmi pīnā pīnā gāwate cægōñongä bitö tömengä önöne wææ wodönedāmaï inte ee abi cæncæcäimpa,” ante Möitee wodi wææ yewæmongacäimpa. İninque Wængonguī dicæ wagada beyænque ante pönēninque mänömainö ante angantawogaa. ¹⁰ Wæætē mönö beyænque ante Wængonguī angampa, ante pönengæimpa. Nāwangä mönö beyænque yewæmongatimpa. Waocā dicæ, Wadānique cæncædānimpa, ante onguipoi mangæ mangæ tæñongää. Wæætē, Mönitö godongāmæ cæncæmönimpa, ante mangæ mangæ tæñongampa. Ayæ tömēmö nē æ yeyacā guiquënë dicæ, Wadānique cæncædānimpa, ante æ yeyacā. Wæætē edæ, Mönitö godongāmæ cæncæmönimpa, ante pönengä inte æ yeyacampa. ¹¹ İninque, Mīnitö mīmōno cænte bai ewocacæmīnimpa, ante cædinque mönatö tömēmö minte pæ bai pönö apænemōna do eñente ewocamīnitapa. Incæte mönatö imōnate wæætē māincooque pönömīni wënæ wënæ ænguënēmōna āmīnitawo. ¹² İñæmpa wadāni

inänite mäincoo ee godömini ænänipa. Mönatö iñömö godömenque apænedinque godömenque ænguënëmöna iñömönate minitö Baa äminitawoo.

Mönatö nē ænguënëmöna incæte cōwē ænāmaī imönapa. Edæ, Mönö Codito ingantedö ante watapæ apænedinque mönatö mäincoo æmöna bai wadäni, Pabodoidi mäincoo æncæte ante apænedapa, ante piinique wææ ancædönänimpa. Inique, Wææ änāmaī incædänimpa, ante cædinque mönatö, Cōwē ænāmaī incæmönaimpa, ante piyænē cæte ee apænemönapa. ¹³ Nāwā Wængonguī cænguī, ante ænte māmö cönönäni ongö adinque Wængonguī oncönē ñænæncönē nē cædäni incæ pancaa ænte ade cænte quëwënänipa. Ayæ, Wængonguī quī, ante baö nāni iya täimpaa nē cædäni adobaī iya täimpaa nāni cönöningä incæ pancacäa ænte cænte quëwënänipa, ante pönëminiyaa. ¹⁴ Mönö Awënē adobaī, Botö imotedö ante watapæ apænedäni ate nē ëñänäni wæætē nē apænedäni inänite cænguī pædæ godönäni ænte cænte quëwencædänimpa, angampa. ¹⁵ Botö guiquënë nē ænguënëmo incæte cænguī ante änāmaī inte cōwē apænebo inömoimpa. Nöwo minitö iminite yewæmöninque botö dicæ, Pönömini æncæboimpa, ante yewæmömogaa. Cænguī ante änāmaī inte botö Wængonguī beyænque apænebo ëñëminipa, ante pönëninque mäninö beyænque tobopa. Mänömainö ante todömo inte botö, Gæwænte wædinque nāñe wæmo incæ wacä mäincoo edæ ænāmaī incæboimpa.

¹⁶ Itota Codito ingantedö ante apænebi ëñencædänimpa, angä ëñente botö nē apænebo

bagaiṃo inte edæ ædö cæte wadö cæquṃoo. Inique botö mänömainö ante nē apænedömo inte edæ, Tömëmo waa cædinque apænebopa, ante ædö cæte tedequṃoo. Edæ botö Itota ingantedö ante möni watapæ apænedö ante wīi apænebo bai edæ botö wæquinque incædönimpa. ¹⁷ Edæ Itota Codito, Apænebi eñencædänimpa, angä eñenique botö Ao ante watapæ todinque apænebo adinque tömengä, Waa cæbi imipa, ante eyepæ pönongä æmaimopa. Wæætē, Wīi apæneinente wæbo incæte botö cöwē apænebo inique edæ tömengä nänö angainonque cæte apænebopa. Edæ botö nē apænequënëmo inte ædö cæte apænedämaï inguṃoo. ¹⁸ Inique botö eñente cæbo beyænque quinö ænguṃoo. Botö Itota Codito ingantedö ante watapæ apænebo beyænque Wængonguï iïmaï pönö cæcä æninque tocæboimpa. Botö apænebo beyæ mīnitö nē pönonguënëmīni incæte pönönämaï imīni inique botö wæætē ænāmaï inte tocæboimpa.

¹⁹ Ayæ waodäni wīi botö awënëidi inänipa. Ayæ botö wacä ingante nē cæbo ināmaï inte abæ tawænte bai quëwëmopa. Incæte botö, Waodäni godömenque nanguï inäni Codito gämænö poncædänimpa, ante cædinque tömänäni inänite nē cæte quëwëmo bai botö baquinque nämä pædæ godonte bai quëwëmopa. ²⁰ Godongämæ cæbo ate oodeoidi incæ Itota gämænö poncædänimpa, ante cædinque botö oodeoidi nāni pönënö bai pönëninque tömënäni nāni quëwënö bai quëwëmopa. Pancadäniya, Möitee wodi nänö wææ angainö eñëmö beyænque mönö quëwengæimipa, ante pönëninque mäninonque ante eñente cædänipa.

Botō guiquēnē, Wīi Mōitee wodi nānō wææ angainō ēñēmō beyænque mōnō quēwengæimpa, ante pōnēmopa. Incæte, Godongāmæ cæbo ate mānīnonque ante nē ēñente cædāni adobaī Itota Codito gāmænō poncædānimpa, ante cædinque botō tōmēnāni ēñēnō baī adobaī ēñente baī cæbopa.

²¹ Wadāni guiquēnē Mōitee wodi wææ ante nānō yewæmongainta adāmaī inānipa. Botō guiquēnē, Wængonguī, Īīmaī cæedāni, ante nānō wææ angainō ante cōwē ēñenguēnēmo inte botō mōnō Awēnē Codito nempo quēwēninque tōmengā nānō angainō ante cōwē ēñente quēwēmopa. Incæte godongāmæ cæbo ate nē adāmaī ināni adobaī Itota Codito gāmænō poncædānimpa, ante cædinque botō wadō pōnēmo incæ tōmēnāni adāmaī inte nāni quēwēnō baī adobaī inte baī quēwēmopa.

²² Ayæ, Godongāmæ cæbo ate æmæ pōnēnāni adobaī Codito gāmænō poncædānimpa, ante cædinque botō tōmēnāni æmæ pōnente quēwēnāni baī æmæ pōnēmo inte baī quēwēmopa. Īīnque, Godongāmæ cæbo ate pancadāniya Codito gāmænō ponte quēwencædānimpa, ante cæcæte ante botō æbānō cæquīmoo, ante wædinque Īīmaī cæbopa. Wadāni nāni quēwēnō baī wadāni nāni quēwēnō baī wadāni nāni quēwēnō baī adobaī cædinque botō tōmānāni nāni quēwēnō baī adodō ante pōnēmo inte baī quēwēmopa. ²³ Edæ, Itota Codito watapæ pōnō cæcā beyænque tōmāmō tōmengā nempo quēwēninque godongāmæ watapæ tocæimpa, ante cædinque mānīnō wadāni nāni quēwēnō baī wadāni nāni quēwēnō adodō ante pōnēmo inte baī quēwēmopa.

24 Edæ nē quingæ pogodo godāni iñōmō tōmēnāni nāni pogodo goīmancadē tōmānāni pogodo godānipa. Incæte adocanque quingæ pogodo gocā inte tāno gote næ gongængā adinque edæ, Bitō adobique quingæ pogodo gote gānā cæbipa, ante pædæ pōnōnāni ængampa, amīnitawoo. Mīnitō guiquēnē quingæ pogodo gote bai gānā cæte æncæte ante tæi piñænte cædāni. 25 Gānā cæcæimpa, ante cædinque tōmēnāni wadō nāni cæinēnō ante cædāmaī inte wæntæye ināmaī inte mānīnonque ante cædānipa. Tōmēnāni guiquēnē gānā cædinque poganta aquīi guiñē wænguiñabo nāni que cædintaque ænte wencacæte ante mānōmaī cædānipa. Mōnō guiquēnē poganta guiñē wænāmaī inta mōnō cōwē encaquinta æncæte ante mānōmaī cæmompā. 26 Mānōmaī impa, ante pōnēnīnque edæ wiñatæ wiñatæ guiddāmaī inte pogodo godāni bai botō tōingā gobopa. Ayæ, Æcānō gānā cæcāā, ante tiyæmāa tamonte guēa cæda bai cædinque botō, Gānā cæcæboimpa, ante tæimō piñænte nō cæbopa. 27 Īnīnque godōmenque godōmenque apænebo ēñēnāni ate tōmēmo oda cædāmaī incæboimpa, ante cædinque botō, Tæi piñænte quingæ gobāwe, ante bai cædinque botō nāmā incæ da godō da godō godoncæte ante nāmā tæi tæi pante bai cæbopa.

10

Wængongui impa, ante nāni cōnōninca

1 Botō tōniñamīni iīmaī ante apænebo ēñēedāni. Mōnō wæmæidi wodi tōmānāni boguimā gānēñōmō quēwente cægongadānipa. Ayæ

tömänäni gäwapæntibædë tæcæguedëmæ ti wææ tao gogadänimpa. ² Ìinque æpænë guite bai cædinque tömënäni Möitee wodi nempo tömänäni nani quëwenguinque edæ boguimämodë godinque gäwapæntibæ tæcægüidëmæ gogadänimpa. ³ Ayæ cænguï Wængonguï öönædë da pönongä wææ nani cæ bai tömengä Önöwoca nänö apænedö adobai ëñente ëwocate quëwengadänimpa. ⁴ Wængonguï Önöwoca apæncä ëñëninque tömänäni godongämæ bete bai ëwocate quëwengadänimpa. Edæ dicabo tæëmonca iñonte Möitee wodi ongonto tæi tæi äayongä æpæ ompade ba begadänimpa. Ìincayæ Ponguingä mönö Codito adobai tæi piñænogä inte tömënäni tönö godongämæ godinque tömengä Önöwoca ingante pönongä æninque tömënäni ompade bete bai äawocaque bai ëwocagadänimpa. ⁵ Incæte wodo tömänäni ëñënamäi cædäni adinque Wængonguï wii togacäimpa. Edæ piiniquæ wænöninque önömæca yabæque wido cæcä ñömængadänimpa.

⁶ Ìinque, Tömënäni wënæ wënæ cæcæte ante nani toinente wædö bai minitö wii adobai toinente wæcæminimpa, ante mönö imonte wææ odömoncæte ante Wængonguï tömënäni nani toinënö beyæ ante pangä wængadänimpa, ante abainpa. ⁷ Pancadäniya nani badonte cönöinca weca ædæ wæænte, Wængonguï impa, ante babæ apænete towengadänimpa. Edæ, “Cæncæte ante becæte ante tæ contadinque tömënäni Yæ yæ owempocæte ante ængæ gantidänitapa,” ante yewæmongatimpa cæminii. Minitö iñömö edæ, Wængonguï impa, ante nani babæ

towengai bai wii adobai caedani. ⁸ Pancadaniya guiquene nanogenga inamai inongante wiwa towengadanimpa. Edae baentitodee miido ganca inani manimpodani edae manomai towenani inte adoonaque inonte nane wengadanimpa, ante adinque ponente wadinque mono waete towenamai ingaimpa. ⁹ Pancadaniya guiquene, Quieme camo inomonte Awene dicae pangaa, ante ancaa wene wene caedani adinque Wengongui taetae anga poae wengadanimpa. Ininque tomenani nani wene wene caegaino ante mono Baa ante wene wene caedamai ingaimpa. ¹⁰ Pancadaniya guiquene Wengongui nano pononincoo adinque, Wengongui wii waemo pononga awedo, ante piinte tededani ate Wengongui anquedo ne wido caedonga inonga inte tomenani inanite wenonte edae wido caegacaimpa. Manomai caea ante adinque minito, Panga wencae wa, ante wadinque tomenani nani piinte tedewengai bai adobai piinte tededamai imawedani.

¹¹ Ininque, Wamini mini adobai panguinque caminipa, ante wae odomoncaete ante pancadaniya inanite Wengongui manomai pangacaimpa. Ayae imamo wodo inque bayonte quewemo inomonte dodani mono imonte wae ancaete ante yewemoinque, Wene wene caedani ate Wengongui abano pangacai, ante aedani, ante wae yewemongadanimpa. ¹² Manomai impa, ante adimini incaete minito, Monito nama ongonte cowe oda caedamai incamoinpa, ante poneminitawo. Edae mini aedocae tae go waewanguinque manomai aneweminipa too. ¹³ Minito wene wene caenente weminitawo. Edae wii

mīnitō adomīnique mǎnōmaī wēnæ wēnæ cæīnente wæmīnīpa. Mōnō waocabo mōnō wēnæ wēnæ cæīnente wæcabo tōmāmō īmōmpa. Incæte mīnitō mīni oda cæquinque wēnæ wēnæ cæīnente wæmīni adīnque Wængonguī mōnō īmonte cōwē nē pōnengā īnongā inte, Oda cædāmaī incæmīnīmpa, ante wææ ānīnque edæ, Idæwaa, angampa. Ayæ wēnæ wēnæ cæīnente wæmīni incæte tōmengā tōō æmænte ængā beyænque mīnitō eyepæ inte ate adiyæ næ gongænīnque oda cædāmaī inguīmīni īmīnīpa.

¹⁴ Mǎnīnō beyænque botō nē waademīni, āmo ēñēedāni. Wængonguī īmpa, ante nāni babæ ante gōnōnīnca gomō adīnque ocæmæ wodii winōedāni āmōpa. ¹⁵ Mīnitō ocai encadōmīni īmīnīpa, ante adīnque botō mǎnōmaīnō ante yewæmōmōpa. Īnīnque botō ānō ante, Nō intawo, babæ intawo, ante mīnitō nē encadōmīni inte apænte ante baī ēñencæmīnīmpa. ¹⁶ Mōnō pōnencabo owæta ænīnque Wængonguī īngante waa ate pōnente apænedīnque, Mōnō Codito wepæ tōmāmō beyæ godonte īmpa, ante pōnēnīnque mōnō pōnencabo īñōmō godongāmæ bemōmpa. Ayæ pāō mōnō pā ænō ænīnque, Mōnō Codito tōnō godongāmæ caate wængaīmō baī īmōmpa, ante pōnēnīnque mōnō godongāmæ cæmōmpa. ¹⁷ Mōnō pāō adocaque ænīnque pā ænte godongāmæ cænīnque mōnō, Pāō adocaque ī baī mōnō tæiyæmō pōnī īmō incæte adocabomō īmōmpa, ante pōnengæīmpa.

¹⁸ Idægoidi ēñagāīnāni īñōmō, Wængonguī quī, ante baō ænte māmō ñōnōnīnque iya tānānīpa. Mānīī baō tōmēnāni nāni iya tāīmpaa ñōnōnīngā

pancacäa æninqwe tömënäni, Baö Wængonguï qui ï bai mönö adobai Wængonguï quimö imompa, ante bai cædinque godongämæ cænänipa, ante do eñëmīnīpa. ¹⁹ Mänömaï äninqwe botö æbänö ämoo, ante pönëmini. Në eñënämaï inäni nāni babæ cönöinca iñömö edæ nāwä Wængonguï ingampa diyæ tömënäni tömengä quinäni ināniyaa. Ayæ, Wængonguï cænguï impa, ante babæ nāni änogä iñömö nāwä Wængonguï cænguï impa diyæ tömënäni Wængonguï tönö godongämæ cænāniyaa. Botö iñömö edæ mänömainö ante dicæ ämogaa.

²⁰ Mänömaï änämaï imo inte botö iïmaï ämopa. Tömënäni, Wængonguï qui, ante babæ cönöinque dicæ nāwä Wængonguï ingante godönāniyaa. Iñæmpa wënæidi inānite godönānīpa cæmīnī. Wënæ tönö cædāni awædö, ante mīnitö gomö adinque godongämæ cænāmaï imæwedāni, ämopa. ²¹ Edæ mönö Awënë bepæ godongämæ bemīni inte mīnitö wënæidi bepæ ædö cæte godongämæ bequimīnī. Mönö Awënë cæimpaa tæ contate godongämæ cæmīni inte mīnitö wënæidi cæimpaa ædö cæte godongämæ tæ contate cænguimīnī.

²² Æmæ pönente bai wënæidi nāni bepæ bemö adinque mönö Awënë piinte badinque pämaingampa, ante eñënīmö inte mönö ædö cæte wënæidi bepæ bequimöö. Tæi piñænte wææ cæmoppa mönö Awënë pänāmaï inguingää.

Ñi cæyænte gote bai quëwente waadete pönengæimpa

²³ Mīnitö iïmaï apænedinque, “Mönö quiëmë bai cæinëmo incæ Wængonguï wææ änämaï ingampa,” ämīnitawo. Iñæmpa mönö cæinënonque

cæte quëwëmö bai wii mönö waa quëwenguinque incædönimpa. Ayæ adobaï, “Mönö cæinonque cæmö incæ Wængongui wææ änämaï ingampa,” ämïnitawo. Iñæmpa mönö cæinënonque cæte quëwëmö bai wacä, Botö adobaï cæbote, ante oda cæcædongäimpa cæmöö. Oda cædämaï incæcäimpa, ante wææ cædinque mönö Wængongui nänö änönonque ante ëñente cæcæimpa. ²⁴ Edæ, Mönö æbänö cæte eyepæ æninque quëwenguimöö, ante nämä beyænque wædämaï inte wæætë wadäni beyæ ante pönëninque, Tömënanï nöingä ante ëñente waa quëwencædänimpa, ante mönö nanguï cæcæimpa.

²⁵ Iñinque baö godonte æncæte ante në mänäni nani æï pancadë gote æninque mïnitö mïmö entawëmïni incæte, Baacä bai intawo, näwäaquiringä intawo, ante apænte änämaï inte guiñënedämaï ade cæedäni. ²⁶ Edæ, Inguipo Wængongui quï impa. Iñinque inguipoga ongoncoo tömancoo adobaï Wængongui quï inte näwäaquincoo impa, ante yewæmongatïi apa guiñëwëmïni.

²⁷ Ayæ në pönënämaï ingä mïnitö imïnite, Pö cæedäni, angä ëñëninque mïnitö goinëmïni inte godinque tæ contayömïni cænguï pædæ pönongä adinque ee ö ænte cæedäni. Baacä intawo, Näwäaquiringä intawo, ante nämanque apænte änämaï inte ade cæedäni. ²⁸ Wæætë wacä tömengä nänö mïmö pönënö beyænque ante wææ äninque, “Wadäni tömënanï, Mönitö wængongui cænguï impa, ante do nani godöni impa iñæmpa cæmïni,” angantawo. Mänömainö wææ angä ëñente wædinque mïnitö në wææ äningä beyæ ante ayæ

tömengä nänö nämä apænte æmæ pönönö beyæ ante edæ cænāmaī iedāni. Iñæmpa inguipo incæ inguipoga ongoncoo tōmancoo incæ mōnō Awēnē qui impa cæminii. ²⁹ Wīi tōmēmīni mīmō entawēnō beyæ ante nämä apænte äninque wæætē nē wææ äningä beyæ ante tömengä nänö nämä apænte æmæ pönönö beyænque ante mīnitō cænāmaī incæmīnimpā.

Incæte bitō wabi iīmaī ante wæbitawo. “Mōitee wodi nänö wææ angainō beyæ ñā cæyænte wægāimo bai inte botō ñōwo ñī cæyænte gote bai imo adinque wacā tömengä nänö nämä apænte æmæ pönönö beyænque ædō cæte botō imote apænte anguingää,” ante wæbitawoo. ³⁰ Ayæ, “Wængonguī ōnonque pōnongä æninque botō tömengä ingante waa ate pōnente apænedinque ade cæmo adinque wadāni iñōmō edæ, Baacā incæ iñæmpa cæmii, ante quīnante pōnō babæ ante tedewēnānii,” ante bitō wæbitawoo. ³¹ Incæte mīnitō cæmīni incæ bemīni incæ quiēmē bai cæmīni incæ mīnitō cædinō adinque wadāni, Wængonguī ñāō apāite bai emōnongä ingampa, ante acædānimpā, ante cædinque waa cæedāni. ³² Edæ mīnitō iñōmō, Waa cæmōni adinque wadāni oodeoidi incæ guidiegoidi incæ Codito ingante nē godongāmæ pōnēināni incæ tōmānāni tee tēwadāmaī inte oda cædāmaī incædānimpā, ante pōnēninque edæ waa cæedāni. ³³ Botō adobai, Botō tōmēmo ænguīnō ante wædāmaī imopa. Wæætē, Botō waa cæbo adinque wadāni Itota gāmænō pōninque tömengä ængä beyænque quēwencædānimpā, ante pōnēninque botō quiēmē cæbo incæ cōwē waa cæbopa.

11

1 Mönö Codito tömengä nänö cæi bai botö adobai cæbo adinque mīnitō botō cæi bai adobai cæbaimīnīpa.

Īimai cæte Wængonguī ingante apæneccæimpa

2 Mīnitō botō ĩmote cōwē pōnēmīni adinque botō mīnitō ĩmīnite waa adinque apænebopa. Ayæ do pōnengaināni nāni apænegainō ante botō adodō ante apænebo ēñēninque mīnitō, Nāwangā impa, ante ēñente cæmīnīpa, ante adinque botō mīnitō ĩmīnite waa ate pōnēninque apænebopa.

3 Nōwo ĩñōmō ĩimai āmo ēñēdāni. Mönö Codito ñænængä ĩnongä ĩnte onguĩñængä ingante nē angä ingampa. Waoda nāna gæncaya adinque onguĩñængä ñænængä bai ĩnongä ĩnte onquiyængä ingante nē angä ingampa. Mæmpo Wængonguī guiquēnē ñænængä pōnī ĩnongä ĩnte mönö Codito ingante nē angä ingampa.

4 ĩninque onguĩñængä ĩñōmō Wængonguī ingante apænedinque ayæ, Wængonguī æbānō angää, ante apænedinque wencadāmai apæneccæimpa. Edæ bee ocadinque tömengä nāmā ocabo ante guĩñencate bai apænebaingampa.

5 Onquiyængä guiquēnē bee ocadinque Wængonguī beyæ apæneccæimpa. Bee ocadinque tömengä, Wængonguī æbānō angää, ante apæneccæimpa. Edæ bee ocadāmai ĩnte nāmā ocamō ante guĩñencate bai onquiyængä apænebaingampa. Mānōmai cædinque tömengä nē ēñēnāmai cædingä ingante nāni eō tocadīngä bai ĩnongä ĩnte encabaingampa. ⁶ Edæ onquiyængä bee ocadāmai ĩngä ĩnte godōmenque eō tocacä

baï waa incædönimpa. Wæætë, Eö tocate wæcæ wæ, ante wæcä ïninqe tömengä ïñömö edæ bee ocabaingampa. ⁷ Edæ onguiñængä ingante badöninqe Wængongui tömengä nänö emönö baï adobaï badongä emongacäimpa. Ìninqe Wængongui nänö ñäö apäidö baï adobaï emönongä inte onguiñængä bee ocadämaï incæcäimpa. Onquiyængä guiquënë onguiñængä nänö emönö mäninqe emönongä ingampa. ⁸ Onguiñængä ingante täno badöninqe Wængongui ayæ onquiyængä ingante badoncæte ante onguiñængä iyapa ænte badongacäimpa. ⁹ Edæ wii onquiyængä beyæ ante onguiñængä ingante Wængongui badongacäimpa. Wæætë, Bitö onguiñængä beyæ quëwencæbiimpa, ante onquiyængä ingante badongacäimpa. ¹⁰ Ìninqe onquiyængä ïñömö, Botö nänöogængä beyæ Wængongui botö imote badongacäimpa, ante pönente wædinque bee ocacæcäimpa. Ayæ, Bee ocabo adinqe Wængongui anquedoidi incæ, Botö nänöogængä nē angä ingampa, ante eñencædänimpa, ante cædinque onquiyængä waa cædinque bee ocacæcäimpa.

¹¹ Incæte mönö Awënë nempo quëwëninque onguiñængä dæ angä baï onquiyængä önonganque baquënegainö anguënë. Wæætë onquiyængä dæ angä baï onguiñængä wæætë önonganque baquënegainö anguënë. ¹² Edæ onquiyængä ayæ dæ añongante tömengä ingante badoncæte ante Wængongui onguiñængä iyapa æninqe badongacäimpa. Wæætë wëñængä onguiñængä ingante onquiyængä mangä beyænque eñacampa. Incæte Wængongui beyænque tömämö

quëwëmompä.

¹³ Onquiyängä bee ocadämaï inte Wængongui ingante apæ necä ïinque waa intawoo, ante mïnitö tömëmïni godongämæ pönëë cöinque äedäni.

¹⁴ Edæ dodäni nãni cægai bai cæquënëmö inte mönö iïmaï ante pönengæimpa. Onguiñängä doyænguï encadinque guiñencate wæquënengä ingampa, ante edonque ate pönëmaïmpa.

¹⁵ Onquiyängä guiquënë tömengä doyænguï pæ ïinque edæ waa ïmpa. Edæ, Doyænguï bee ocacæbiïmpa, ante onquiyängä ingante Wængongui badongä encacampa.

¹⁶ Botö mänömainö ante apænebo ëñëinque mïnitö pancamïniya wæætedö wæætë äinëmïnitawo. Ìñæmpa botö äninö bai mönitö cöwë cæmönipa. Ayæ Codito ingante godongämæ nãni pönencabo adobai Wængongui quïnãni ïnönãni inte edæ cöwë mänömaï cædänipa cæmïni.

Awënë cæmæ ante bedinque pancamïniya wiwa cæmïni

¹⁷ Mïnitö mïni waa quëwenguinque ante godongämæ ponguënëmïni incæte mïni godömenque wiwa quëwenguinque godongämæ pömïni awædö. Ìinque botö, Waa cæmïnipa, ante ædö cæte anguïmoo.

¹⁸ Ìïmainö ante ñöwo täno apænebo ëñëedäni. Codito ingante mïni pönencabo godongämæ pöninque mïnitö ïñömö mïni caipæ incæ wæætë godö wæætë godö tedewëinque wacabo nänënë wacabo nänënë bamïnipa. Ante apænedäni ëñëinque botö, Wabänö nöingä ante apænedänipa, ante pönëmopa.

¹⁹ Näwangä ïmpa, ante pönëmopa. Edæ, Ædänidö ïnänite Wængongui

waa acää, ante edonque acæimpa, ante tömengä angä ate mīnitō mīni cabo wadō ante mīni cabo wadō ante tedemīnipa, ante awædō.

²⁰ Īninque, Awēnē ææmæ impa, ante godongāmæ pōninque mīnitō wīi mōnō Awēnē ææmæ bete baī cæmīni awædō. ²¹ Edæ mīni godongāmæ cæñedē incæ mīnitō, Wadāni adobaī cæncædānimpa, ante ee ongōnāmaī ĩmīni inte tömāmīni cænguī ade cæmīnipa. Pancadāniya ayæ gæwænte ongōñōnāni edæ pancamīniya do tömo bete dowænte wæmīni awædō. ²² Īñæmpa oncō ōmaamīni baī inte mīnitō tömēmīni oncōnē cænte wīi bemīni. Edæ Codito ingante mōnō godongāmæ pōnencabo Wængonguī quīmō ĩmō incæte mīnitō nāēmæ pīinte cæmīni awædō. Ömæpodāni incæ tömēnāni nāni guingo imonte wæquinque ante mīnitō pæ gompote ade cæmīnipa töō. Mānōmaī cæmīni adinque botō dicæ, Waa cæmīnipa, āmogaa.

Mönō Awēnē ææmæ

(Mäateo 26.26-29; Mäadoco 14.22-25; Odoca 22.14-20)

²³ Edæ mōnō Awēnē botō ĩmote pōnō apænecä ēñēninque botō wæætē ĩmaī ante mīnitō ĩmīnite pōnō apænetabopa. Mönō Awēnē Itota ingante Codaa nānō odōmonte godongaiōnæ woyowotæ ĩñonte Itota päō æninque, ²⁴ Wængonguī ingante waa ate pōnente apænedinque päō pä æninque angacäimpa. “Īi päō botō baō baī impa. Botō, Mīnitō quēwencæmīnimpa, ante botō baō godonte baī cædinque wæncæboimpa. Botō pä ænte pædæ

pönömo bai mīnitō adobai iincayæ ate botō imote ante pönēninque godongāmæ cæedāni,” angantapa.

²⁵ Mänömaī angā iinque cænāni ate owæta adobai æninque tōmengā, “Botō wepæ iimæ bai impa. Wængonguī do apænedinque, Botō pönö cæbo ate mīnitō Ao ämīni iinque mönō godongāmæ waa cæte quëwengæimpa, angacäimpa. Nōwo adobai miine äninque apænebopa. Botō wepæ ante Ao ante æmīni inte mönō godongāmæ waa cæte quëwengæimpa. İninque mīnitō wantæ wantæ iñö bedinque botō imote ante pönente becæminimpa.”

Ante Itota angā begadānimpa. ²⁶ İninque Itota nänö ponguionæ ganca mīnitō mänömaī päö wæætē wæætē cæninque mänimæ bai wæætē wæætē bedinque, Mönö Awënë tōmämö beyæ wængacäimpa, ante odōmonte bai cæmīni adinque wadāni eñencädānimpa.

Nöingā ante pönēninque mönö Awënë ææmæ becäimpa

²⁷ Mänömaī i iinque waocä pönēnāmaī inte mönö Awënë päö önonque cæninque Awënë nänö bequimæ önonque bedinque tōmengā nänö wentamö mongænguinque mönö Awënë baö ante, Önonque impa, ante piinte bai cædinque tōmengā wepæ önonque wido cæte bai cæcampa.

²⁸ İninque, Æbänö entawēmöö, ante mīnitō nāmā näëmænte cōwā adinque nöingā ante pönēninque päö cæninque mänimæ bequënēmīni iminipa.

²⁹ Edæ, Mönö Awënë baö bai impa, ante æcänö pönēnāmaī inte cænte beda iñömö tōmengā nāmā nänö apænte pante wæquinque mänömaī cænte becampa. ³⁰ Edæ mänömaī cæmīni beyænque

pancamīniya aquīimīni badinque wæntæye bamīnīpa. Pancamīniya wīi pōnente wæmīnīpa. Ayæ wadāni æpodānimē mānīnō beyænque do æmæwo wænānimpa.

³¹ Incæte mōnō cōwā adinque nāmanque apænte āninque nōingā cæmō īninque mōnō Awēnē wæætē mōnō īmonte apænte ante pīnāmaī īmaingampa.

³² Mōnō Awēnē mīnitō īmīnite apænte ante pīingantawo. Edæ mōnō Awēnē, Inguipogaque quēwēnāni īnānite apænte āninque botō pāñedē mīnitō wīi adobaī pante wæquīmīni, ante wææ cædinque ñōwo īñōmō edæ, Ēñguēnē quēwēedāni, ante wædænque pangā wæmompā.

³³ Botō tōñīñamīni ēñēedāni. Mānōmaī ī, ante pōnēninque mīnitō cæncæte ante pōninque ee ongōñōmīni tōmānāni adoyōmō pōnāni ate godongāmæ cæedāni. ³⁴ Godongāmæ pōninque mōnō wīi apænte panguēnēmō bacæimpa, ante wææ cædinque mīnitō nē gæwænte wæcā ingante āmīni oncōnē tāno cæncæcāimpa. Ñōwo māninque ante yewæmōninque botō mīnitō weca īincayæ ate pōninque wadō mīni ānīnō ante godōmenque apænebo ēñencæmīnimpa.

12

Wængonguī Ōnōwoca pōnō cæcā æninque cæcæimpa

¹ Īñānāni ēñēedāni. Wængonguī Ōnōwoca mōnō īmonte pōnō cæcā ate tōmengā nānō pōnōnoncoo eyepæ ænte ēwocadinque mōnō æbānō cæquī, ante ēñēninque mīnitō oda cædāmaī incæmīnimpa, ante ñōwo yewæmōmo aedāni.

2 Doyedē iñōmō mīnitō ēñēnāmaī iñōmīnite wadāni, Mōnitō miñæ pōedāni, ante æbāmē cæte ænte māodāni gogamīnimpa. Tōmēnāni miñæ mǎnōmaī go go cædinque mīnitō do oda cædinque babetade nāni badōninca weca ædæ wæænīnque, Mōnitō wængonguī impa, ante cædinque quēwengamīnimpa. 3 İnīnque mīnitō İmīnite botō ñōwo, Ēñenguēnē quēwēmīnii, ante İmaī ante apænebopa. Æcānō Wængonguī Önōwoca tōnō āāwocaque baī ēwocacā guiquēnē tōmengā, İtota nānō panguīnque nē wentamō mongængā ingampa, ante ædō cæte tedewenguingāā. Ayæ wæætē Wængonguī Tæiyæ Waēmō Önōwoca tōnō ēwocadāmaī ingā guiquēnē tōmengā, İtota Tæiyæ Awēnē ingampa, ante ædō cæte apænequingāā.

4 Adocanque ingante wadō pōnō cædinque Wængonguī Önōwoca wacā ingante wadō pōnō cædinque tōmengā nānō pōnōnincoo nēnempote baī cæcā ænīnque mōnō wadō wadō nē cæmō İmōmpa. Wængonguī Önōwoca adocanque pōnī İnongā incæ mǎnōmaī wadō wadō pōnō cæcampa.

5 Ayæ mōnō Awēnē adocanque pōnī İnongā inte waocā adocanque ingante, İmaī cæe, ānīnque wacā ingante, Wadō baī cæe, angā ēñēnīnque mōnō tōmāmō wadō wadō nē cæmō İmōmpa.

6 Ayæ Wængonguī adobaī adocanque pōnī incæ tæī piñængā İnongā inte waocā adocanque ingante pōnō cæcā ænīnque tōmengā tæī piñængā badīnque inte wadō cæcampa. Wacā ingante wadō pōnō cæcā ænīnque tōmengā tæī piñængā badīnque wadō wadō cæcampa. İnīnque Wængonguī mǎnōmaī wadō wadō pōnō

cæcä æninque mönō tōmāmō eyepæ badinque cæmompā.

7 Wængonguī Ōnōwoca, Tōmānāni waa quēwencædānimpā, ante cæedāni, ante tōmāmō īmonte wadō wadō pōnō odōmonte apænecā ēñēninque tōmāmō mönō waa quēwenguinque ante godongāmæ cæmompā.

8 Īninque Wængonguī Ōnōwoca pancadāniya ĩnānite, Wængonguī nō nānō ēñēnō ante apænecā ēñēninque tōmēnāni nē nō ante apænedāni badānīpā. Ayæ adocā Ōnōwoca ĩñōmō Wængonguī nānō cædō ante edonque odōmongā adinque pancadāniya nē adīnāni badinque, Wængonguī mānōmāi cæcampa, ante nō apænedānīpā.

9 Adocā Wængonguī Ōnōwoca apænecā ēñēninque pancadāniya, Wængonguī eyepæ pōnō cæcampa, ante wede pōnēnāni inte tōmēnāni wede nāni pōnēnō beyænque nanguī cædānīpā. Ayæ Wængonguī Ōnōwoca adocanque ĩnongā inte pōnō cæcā æninque pancadāniya wēnæ wēnæ ĩnāni ĩnānite gampote apænedāni ate waa badānīpā.

10 Pancadāniya ĩnānite guiquēnē Wængonguī Ōnōwoca godō cæcā æninque tōmēnāni tæi pīñænāni badinque nanguī pōnī cædānīpā. Wængonguī Ōnōwoca apænecā ēñēninque wadāni Wængonguī beyæ nē apænedāni ĩnānīpā. Ayæ wacā yewænte baī tedecā adinque, Wængonguī Ōnōwoca tedecantawo, wēnæ tedecantawo, ante wæyōnāni Wængonguī Ōnōwoca pancadāniya ĩnānite edonque odōmongā adinque tōmēnāni, Æcānō ōnōwoca nē tedecāā, ante do ēñēnānīpā. Pancadāniya guiquēnē Wængonguī Ōnōwoca tōnō

apænedinque wadāni nāni tede bai nē tededāni inānipa. Ayæ iināni wadāni nāni tede bai tededāni eñēninque pancadāniya Wængongui Önōwoca apænecā eñēninque, Nē tededāni æbānō ante tededāni, ante do eñēnāni inte wadāni inānite edonque pōni apænedāni eñēnānipa.

¹¹ Īninque adocā Önōwoca adocanque inongā inte tōmengā nānō nō angai bai cædinque mōnō imonte apænte æninque, Pancamīniya iimāi cæcæmīnimpā, wamīni iimāi cæcæmīnimpā, ante pōnō cæcā æninque adocanque nānō cæquēnēnō ante wacā nānō cæquēnēnō ante edæ tōmāmō mōnō cæquēnēnō ante cæmompā.

Adocabomō bai imompā

¹² Mōnō baō adoyonque pōni eñāmō incæ mōnō wīi adodonque cæquīnō ante eñāmō inte mōnō pæ pagænguīncoo watai watai eñāmompā. Edæ wadō mōnō cæquīnō ante watai eñadinque mōnō wæætē wadō cæquīnō ante watai watai eñāmompā. Īninque watai watai nanguī mōnō eñācoo iñōmō adoyonque pōni impā. Ayæ Codito nempo quēwēninque mōnō adobai adocabomō imompā. ¹³ Mōnō adocabomō mōnō tōmāmō baquinque Wængongui Önōwoca mōnonga pō guite owocampā. Īninque oodeocā incæ guidiegocā incæ wacā ingante nē cæcā incæ abæ tawænte ee gote bai nāmā beyænque nē cæcā incæ mōnō tōmāmō adotaca bete bai Wængongui Önōwoca tōnō äawocaque bai tōmāmō ewocampā.

¹⁴ Mōnō baō adoyonque pōni eñāmō incæ mōnō wīi adodonque cæquīnō ante eñāmō inte mōnō eñācoo watai watai nanguī eñāmompā.

15 Ìninqe mōnō ōnōwa incæ, “Ōnompō ōmæpobo inte botō waocā baō ōmaabo ìmopa,” ante ædō cæte anguingää. Ìñæmpa mǎnōmaï wæte tedecā incæ ōnōwa cōwē waocā baō ēñate ēwacampa. 16 Ayæ mōnō ōnōmonca incæ, “Awinca ōmæmōmo inte botō waocā baō ōmaabo ìmopa,” ante ædō cæte anguingää. Ìñæmpa mǎnōmaï ante tedecā incæ ōnōmonca cōwē waocā baō ēñate ēmoncacampa. 17 Ìñæmpa mōnō baō tōmǎñō awincaque ēmōmō baï edæ quimoncadō ēñenguēnēi. Ëñēnāmaï incædōmōimpa. Ayæ mōnō baō tōmǎñō ōnōmoncaque ēmoncamō baï quincadodō ongoncadoquēnēi.

18 Incæte Wængonguï ìñōmō edæ, Waomīni mīni cæquēnēnō ante eyepæ cæcæmīnimpā, ante badoncæboimpā, ante Wængonguï angacāimpā. Ìninqe tōmengā nāmā nānō angainō baï badōninqe mōnō pæ pagænguincōo adoyonque baquinque ante wadō cæquīnō ante wadō cæquīnō ante tōmǎñō badongacāimpā. 19 Edæ adonque pōnī mōnō cæquēnēnō ante Wængonguï badongā baï mōnō wadō mōnō cæquēnēnō ante quīdō pæ pagænte cæquēnēi. 20 Wængonguï nānō nē badongaimō ìnōmō inte wadō mōnō cæquīnō ante watai wadō mōnō cæquīnō ante watai nanguï mōnō ēñacōo ēñamō incæ mōnō baō adoyonque pōnī ēñamōmpā.

21 Mǎnōmaï ēñamō ìñōmonte edæ mōnō awinca incæ ōnompō inte apænedinque, “Bitō dæ āmi baï botō tōmēmō eyepæ cæcædōmoimpā,” ante ædō cæte anguīi. Ayæ wæætē mōnō ocamō incæ ōnōwa inte apænedinque, “Bitō dæ āmi baï botō tōmēmō eyepæ cæcædōmoimpā,” ante

ædö cæte anguüi. ²² Wæætë mönö baö pancay-
onga pæ pagænämaï i incæte mäniñö ante mönö
godömenque waa adinque, Mönö quëwenguñö
impa, ante angæimpa. ²³ Wayö guiquënë, Wïi
waëmongä awædö, ante mönö añö ante, Waa
acædänimpa, ante cædinque waëmoncoo pönö dadi
ompogate mäniñö beyæ godömenque waa ate bai
cæmompä. Wayö guiquënë mönö guiñëñate wædö
ante, Wïi edonque acæimpa, ante pönö bee ogate
cædinque mönö guiñëñayö beyæ godömenque waa
cæmompä. ²⁴ Waëmö mönö ayö guiquënë, Edonque
acæimpa, ante bee ogadämaï cæmompä.

Incæte, Adoyonque bacæimpa, ante mönö
baö wayö wayö badöninque Wængongui, Wïi
waëmongä, ante mönö wæyö ante pönëninque,
Mäniñö botö godömenque waa abopa, ante
badongacäimpa. ²⁵ Ìninqe, Minitö baoncoo näëmæ
pïinämaï incæminimpa, ante cædinque Wængongui
mönö baö adoyonque badongacäimpa. Wæætë
minitö nämä baoncoo incæ näëmæ waadete
waa cæcæminimpa, äninque Wængongui tömäñö
waa acampa. ²⁶ Ìninqe mönö baö adoyömonque
nantate wæyömö tömäo wootæ wootæ nantate
wæmompä. Ayæ wæætë adoyömonque adinque,
Waëmö impä, änäni ëñente wædinque tömäo
watapæ tomompä.

²⁷ Minitö iñömö, Wayö wayö ëñamö incæ
adoyonque ëñamompä, ante do pönëninque,
Mönö adobai nänënë nänënë ingaimö inte ñöwo
wæætë Codito nempo quëwëninque adocabomö
imompä, ante pönencæminimpa. ²⁸ Ìninqe
Codito ingante godongämæ mönö pönencabo
imö adinque Wængongui angä ëñëninque iïmaï

cæmompā. Yæcadomōni imōni iñōmō Codito nānō da godongaimōni imōnipā. Gao wæi ināni iñōmō Wængongui beyæ nē apænedāni inānipā. Ayæ tæcæguedēnāni ināni iñōmō nē odōmonte apænedāni inānipā. Wæænōmenque ināni iñōmō tæi piñænte entawente nē nanguī cædāni inānipā. Yæmiñæ gao æidinqe ināni iñōmō Wængongui Ōnōwoca tōnō āawocaque bai ēwocadinque iimaī cædānipā. Pancadāniya, Wēnæ wēnæ ināni waa bacædānimpa, ante nē waa cædāni inānipā. Pancadāniya wadāni beyæ nē waa cædāni inānipā. Pancadāniya nē ānāni inōnāni inte awēnēidi inānipā. Ayæ yæmiñæ pōni ināni iñōmō wadāni nāni tede bai nē tededāni inānipā.

²⁹ Mānōmaī imō incæte edæ Codito nānō nē da godongaimō dicæ tōmāmō imongaa. Ayæ Wængongui beyæ nē apæneimō dicæ tōmāmō imongaa. Nē odōmōnōmō dicæ tōmāmō imongaa. Nē tæi piñænte entawente nanguī cædōmō dicæ tōmāmō imongaa. ³⁰ Ayæ Wængongui Awēnē pōnō cæcā incæte wēnæ wēnæ ināni nāni waa baquinque ante dicæ tōmāmō nē waa cæmongaa. Edæ wadāni nāni tede bai dicæ tōmāmō tedomongaa. Wacā mānōmaī wadāni nāni tede bai tedecā ēñēninque tōmāmō dicæ mōnō tededō adodō edonque apænemongaa. ³¹ Incæte mīnitō Wængongui ingante, Bitō Ōnōwoca pōnō cæcā ate mōnitō eyepæ inte ate yæcado ongōnāni nāni cæi bai adobai cæcæte ante nanguī wæmōnipā, ante apænedinqe nanguī cæedāni.

Mōnō waadete pōnente cæccēimpa, ante

Ñöwo ññömö botö, Æbänö godömenque waa pönï cæquii, ante yewæmonte odömömo aedäni.

13

¹ Botö waodäni nāni tede bai tede bopa, ämīnitawo. Wængonguī anquedoidi nāni tede bai tede bopa, ante tomīnitawo. Ññæmpa mönö wadäni ññānite waadedāmai inte tedemö ññinque ampoincade önonque ampoi bai ññaimpa. Waadedāmai inte tedemö ññinque adoyömö pönö wo pönö wo pönö wæcainta bai mönö adobai önonque tedewēmö ññaimompa.

² Wængonguī Öñöwoca pönongä æñinque botö tömengä beyæ nē apænebo ñmopa, ante tomīnitawo. Waodäni nāni wē wodonte ēñgainö tömänö ante edonque pönï ate ēñēmopa, ante tomīnitawo. Waodäni nāni nanguī ēñēnö ante adinque tömänö ante ēñēmopa, ante tomīnitawo. Edæ nē wede pönēmīni inte mīnitö änanquidi incæ ämīni ēñente cabænte gotawo. Ññæmpa mäninö tömänö waa pönï cæmö incæ mönö wadäni ññānite waadedāmai inte cæmö ññinque wæætē öñömonque edæ mönö babaimpa.

³ Ömæpodäni ññānite botö mäincoo tömää nēnempote godömopa, ante tomīnitawo. Wængonguī beyæ ante cæyömote wadäni botö baö botö ēñayö incæ iya tancæ cædäni ate wædinque botö piyænē cæbaimopa, ante mīnitö, Waa cæbopa, ante tomīnitawo. Ññæmpa mänii tömää waa cædinque mönö waadedāmai inte cæmö ññinque mönö waa cædö beyæ æñāmai ññaimompa.

4 Nē waadete pönengä iñömö tömengä püināmaï inte edæ piyænē cædinque godö waadete cæcampa. Wadäni gomonga cædinque godömenque nanguï ænäni adinque nē waadecä wæætē waadete pönëninque piïnte wädämaï inte piyænē cæcampa. Nämä nänö cædinö ante pönëninque nē waadete pönengä iñömö, Botö gomonga cæbopa, ante tededämaï ingampa. Tömëmoque waëmö imopa, ante nämä waa adämaï ingampa. 5 Wacä tæcæ cæyongante nē waadete pönengä iñömö, Täno cæbote, ante wææ cädämaï ingampa. Nämä nänö æinënö ante cädämaï inte tömengä wadäni beyænque cæcampa. Wæætē wüi iñontobæ ænguï bacampa. Wadäni wënæ wënæ cædäni ate wædinque tömengä nē waadecä inongä inte wæætē piyænē cæcampa.

6 Ìninqe, Wacä wënæ wënæ cæcampa, ante tededäni ëñente wædinque nē waadete pönengä iñömö mäninö ante todämaï ingampa. Wæætē, Wacä nöingä cæcampa, ante tededäni ëñëninque tömengä watapæ pönï tocampa. 7 Æbämë cædäni incæ nē waadete pönengä iñömö piyænē cædinque tömänäni inänite wææ gom pocampa. Wæætē, Waa cædänipa, änäni ëñëninque tömengä, Nawangä impa, ante do ëñengampa. Æbämë ba incæte tömengä, Ayæ ate watapæ bacæimpa, ante cöwë pönëninque wæntædämaï inte ee cæcampa.

8 Mönö waadete pönëmämo iñömö cöwë dæ badämaï ingæimpa. Wæætē Wængonguï iincayæ ate, Idæwaa, angä ininqe inguipoga tömengä beyæ mönö apænedö guiquënë edæ dæ angæimpa. Wadäni näni tede bai mönö

tededö incæ pæ wëenecæïmpa. Inguipoga nanguï adinque mönö eññenö ante Wængonguï, Idæwaa, ancæcäïmpa. ⁹ Ñöwo mönö eññenö iññömö pancaa eññenique pancaa wæætë oda cæmompä. Wængonguï beyæ mönö apænedö iññömö pancaa apænedinque mäninque apænemompä. ¹⁰ Ìinque bayedë guiquënë Wængonguï nänö apænedö ædæmö eññenique mönö nöingä pönï odömönte apænecæmöïmpä. Oda cæte mönö eññenö ante, Idæwaa, äninque Wængonguï mäniñedë edæ mönö wïi eyepæ apænete wädö ante, Idæwaa, ancæcäïmpä.

¹¹ Botö iññömö wëñæmoyedë wëñængä nänö tede bai tededinque wëñængä nänö ocai eññenö bai eññengäïmo inte wëñængä, Ìïmai ïmpä, ante nänö pönënö bai botö mäniñedë adobai pönengaboïmpä. Ñöwo guiquënë picæmo badinque wëñæmoyedë botö cægäinö ante ñïmpo cæbopä. ¹² Awocawænta wëmö ate bai cædinque mönö ñöwo Wængonguï Önöwoca nänö odömönö ante edæ wïi edonque amompä. Ayæ ate guiquënë mönö awincadö awinca edonque pönï acæïmpä. Botö ñöwo pancaa adinque oda cæte eññëmö ïmopä. Ayæ ate guiquënë Wængonguï pönö odömongä adinque tömengä botö ïmote edonque pönï acä bai botö adobai tömää eyepæ pönï acæboïmpä.

¹³ Ìinque mönö entawënoncoo ante adinque mënonque go adodonque mänimpodonque ayæ ongompä. Mönö wede pönënö ante ædæmö entawengæïmpä. Watapæ bacæïmpä, ante mönö pönënö ante ædæmö entawengæïmpä. Mönö waadete pönënö ante ædæmö entawengæïmpä.

Īninque mänimpodonque ayæ ongö incæte mönō waadete pönēnō ĩñömō edæ ñænænō pōnī ĩ ĩninque mönō mäninō ante tāno ædæmō entawengæimpa.

14

Wadāni nāni tede bai æbānō tedequī, ante

¹ Īninque mīnitō, Nē waadete pōnēmō bacæimpa, ante mäninonque ante pogodo gote bai nanguī cæedāni. Ayæ adobaī, Wængonguī Ōnōwoca mönō ĩmonte nānō pōnōnō bai mönō eyepæ ēwocadinque cæcæimpa, ante nanguī æinente wæedāni. Mäninō Wængonguī Ōnōwoca nānō pōnōnoncoo ate adinque mīnitō, Wængonguī beyæ nē apænemō mönō tāno adodonque ante bacæimpa, ante godōmenque æinente wæedinque cæedāni. ² Edæ wadāni nāni tede bai æcānō tededa tōmengā wīi waodāni ĩnānite apænecampa. Wængonguinque ingante apænecampa. Edæ tōmengā ōnōwocaque tedecā ĩninque tōmengā ingante Wængonguī æbānō awēmō apænecāā, ante ædō cæte ēñenguinānii. ³ Wængonguī beyæ nē apænecā guiquēnē waodāni ĩnānite waadete pōnēninque ĩmaī cæcæte ante apænecā ēñēnānipa. Mīnitō tæī piñæmīni mīni entawenguinque wede pōnencæmīnīmpa, ante apænecampa. Ayæ, Wæwente quēwēmīni incæ mīnitō wampo bawēnente tæī piñænte cōwē cæcæmīnīmpa, ante tōmengā Wængonguī beyæ ante pōnō apænecampa. ⁴ Wadāni nāni tede bai nē tedecā guiquēnē, Tōmēmo tæī piñæmo botō entawenguinque ante nanguī ēñencæboīmpa, ante nāmā beyænque ante tedecampa. Wængonguī beyæ nē apænecā guiquēnē Codito ingante nāni

godongämæ pönencabo beyæ ante apænedinque, Minitö tæi piñænte mīni entawenguinque eñencæmīnīmpa, ante apænecampa.

⁵ Īnīnque mīnitö tōmāmīni wadāni nāni tede bai apænemīni adinque botö wædænque tobaīmopa. Wæætē tōmāmīni Wængonguī beyæ apænemīni adinque botö godōmenque watapæ tobaīmopa. Wængonguī beyæ nē apænecā iñōmō ñænængä iñongä wacā tededö nē tedecā guiquēnē wædangä ingampa. Incæte, Codito ingante mīni godongämæ pönencabo tæi piñænte entawencæmīnīmpa, ante cædinque tōmengä wacā tededö tedete ate, Īmaī ante tedetabopa, ante mīnitö tededö adodö ante edonque apænecā ĩnīnque tōmengä adobai ñænængä ĩnongä ĩmaingampa. ⁶ Īñānāni eñēedāni. Wængonguī nānō wē wodönō incæ tōmengä nānō nō eñēnō incæ tōmengä nānō nō odömönō incæ ante botö mīnitö weca pōnīnque odōmonte apænebo eñēnīnque mīnitö godōmenque pōnēmaīmīnīpa. Wængonguī ĩmaī cæcæcāīmpa, ante apænebo eñēnīnque mīnitö guīñente wædinque waa cæbaīmīnīpa. Wæætē mīnitö weca pōnīnque botö wadāni nāni tedebai tedete apænebo bai mīnitö ædö cæte godōmenque nē pōnēmīni baquēnēmīnīi.

⁷ Edæ gobæ ongonte aa pedīnque ōnonque ante pedāni eñēnīnque mōnō wæætē, Ædemē ante pedānīpa, ante ædö cæte eñenguīi. Nē ampoinca ampodāni adobai āmotamīni ĩnāmaī ōnonquedö ante ampodāni eñēnīnque mōnō, Ædemē ante ampodānīpa, ante ædö cæte eñenguīi. ⁸ Ayæ tontado adobai, Wæætedö wæætē cæcæīmpa, ante todompeta nāni ancadeca we ōōnīnque

idiquibæ we öongä ïinque wadäni, Æbämë cæcæte ante we öongäa, ante wædinque oda cæte ee ongonte wæætedö wæætë cædämaï ïmainänipa. ⁹ Ayæ mïni cabo adobaï wïï edonque apænemïni ëñëninque wadäni, Æbämë ante tedecäa, ante wædinque oda cæte wæbainänipa. Woboyæ mämoque ïñæmpa tedewëmaïmïnipa.

¹⁰ Waodäni inguipoga tömäo quëwëninque nanguï nani tededoncoo tededänipa. Näwangä impa. Incæte wadäni nani tededö wadäni nani tededö tömäa tedequinö ï ïinque adodeque incæ önonque tedete ïnämaï impa. ¹¹ ïinque wacä apænecä ëñëninque botö, Æbänö ante tedecäa, ante ëñënämaï ïmo adinque tömengä wæætë, Wabi inte wïï ëñëmipa, ancædongäimpa. Tömengä ingante botö adobaï, Wabi inte botö tededö wïï tedebipa, ante ancædömoimpa. ¹² ïinque mïnitö, Wængonguï Önöwoca pönö cæcä æninque mönö eyepæ ëwocadinque cæcæimpa, ämïnitawo. Mänömaïnö äninque mïnitö, Wængonguï Önöwoca pönö cæcä ænte ëwocadinque cædömö inte mönö Codito ingante mönö godongämæ pönencabo godömenque tæï piñænte entawengæimpa, ante pönëninque mïnitö, Mänïnonque ante botö ëwocate cæquinö ante pönongä æncæboimpa, ante täno æïnente cæedäni.

¹³ Mänömaï beyæ wadäni nani tede baï në tedemïni ïñömö mïnitö tönïñadäni adobaï ëñencædänimpa, ante cædinque Wængonguï ingante ïïmaï ante äedäni. Wængonguï ëñëmi. Wadäni nani tede baï do tededinque botö æbänö ante tedetawoo, ante bitö odömonte apænebi

ēñēmoe. Mänömainö ante apænebi ēñēninque botö wæætē mönitö tededö adodö ante edonque apænebo ēñēninque mīnitö Wængonguī ingante apænete cæedāni. ¹⁴ Wadāni nāni tede bai tededinque Wængonguī ingante apænebo inte botö önöwocaque pönente apænedinque ocai ömædæcabo bai inte apænebaïmopa.

¹⁵ Mänömaï impa, ante adinque æbänö cæquïmoo. Edæ önöwoca pönente apænedinque botö ocai adobai ēñente pönēninque Wængonguī ingante apæneboimpa. Ayæ Wængonguī ingante waa pönī apæneceæte ante önöwoca pönente ämotamīni äninque adobai ocai ēñente pönēninque ämotamīni ancæboimpa. ¹⁶ Bitö, Wængonguī ingante waa pönī cæcampa, ante önöwocaque pönēninque apænebitawoo. Ìñæmpa Wængonguī ingante waa ate pönēninque önöwocaque pönente apænebi ēñēninque wacā nē önonganque ingā guiquēnē, Bitö æbänö apænebii, ante ēñēnāmaï inte, Ædö cæte Ao anguïmoo, ante wæbaingampa. ¹⁷ Bitö waa ate pönēninque önöwocaque waa apænebi ēñēninque tömengä wæætē, Bitö æbänö ancæte ante tede bii, ante ēñēnāmaï inte ædö cæte godömenque tæi piñænte entawenguingää. ¹⁸ Botö iñömö, Mīnitö wadāni nāni tede bai wædænque tedeyömini botö godömenque nangui tede bopa, ante Wængonguī ingante waa ate pönēninque apæne bopa. ¹⁹ Incæte Codito ingante mönö pönencabo tönö godongämæ pöninque botö wadāni nāni tede bai tæne tincö miido ganca tedequī incæ wīi tededinque wæætē, Wadāni ēñencædānimpā, ante mēnea pönī edonque apænedinque waa tobaïmopa.

20 Iñanāni eñeedāni. Tæcæ eñadāni iñömö wænæ wænæ mönō cæpāmo ante eñenāmaï inānīpa. Minitō adobaï mānīnō wænæ wænæ mönō cæpāmo ante eñenāmaï inte baï pōnēedāni. Wæætē ocaï mönō pōnēnō guiquēnē mīnitō mānīnō ante wēñænānique wædænque nāni encadō baï wīi pōnēninque wæætē picænāni nāni nanguï encadō baï adobaï nanguï encate pōnēedāni. 21 Dodāni mönō Awēnē beyæ ante wææ āninque iīmaï ante yewæmongadānimpa. “Wadāni nāni tede baï nē tededāni inānite botō āmo eñēninque tōmēnāni wæætē botō quīnāni inānite apænecædānimpa. Incæte iīnāni guiquēnē botō imote cōwē eñenāmaï inguīnāni awædō, ante mönō Awēnē angampa,” ante yewæmongatimpa.

22 Iñinque, Wadāni nāni tede baï tedemīni eñēninque nē pōnēnāni wædāmaï iñōnāni nē pōnēnāmaï ināni guiquēnē mānōmaï tedemīni eñēninque guīñente wæcædānimpa, ante cædinque Wængonguï Önōwoca pōnō cægacāimpa. Wæætē Wængonguï beyæ ante edonque apænemīni eñēninque nē pōnēnāmaï ināni wædāmaï iñōnāni nē pōnēnāni guiquēnē do eñencædānimpa, ante cædinque Wængonguï Önōwoca pōnō cægacāimpa. 23 Codito ingante mīni pōnencabo godongāmæ pōninque tōmāmīni wadāni nāni tede baï wadāni nāni tede baï tedemīni adinque ayæ pōnāni guiquēnē nē eñenāmaï ināni incæ nē pōnēnāmaï ināni incæ æbānō anguīnānīi. Mānōmaïnonque tedemīni eñēninque tōmēnāni wæætē, Mīnitō ömædæcamīni inte önonque tedewēmīnīpa, ante wæbainānīpa.

24 Tömämīni wæætē Wængonguī beyæ edonque apæneyōmīni nē pōnēnāmaī ingā incæ nē ēñēnāmaī ingā incæ ponte ēñēninque tōmāmīni mīni apænedō beyæ tōmengā, Botō wēnæ wēnæ cætabopa, ante wæbaingampa. Ayæ Wængonguī beyæ ämīni ēñente wædinque tōmengā, Botō nāwangā wēnæ wēnæ cædōmo inte wentamō mongænte awædō, ante nāmā apænte ämaingampa.

25 Ayæ tōmengā mīmōno nānō wentamō wē wodōnincoo da tadonte ate baī edonque ate wædinque tōmengā ædæ wæænte guidōmēmæ ñongæninque Wængonguī ingante, Bitō adobique nē waa cæbi imīpa, ante waa apænebaingampa. Ayæ mīnitō imīnite, Nāwangā Wængonguī Önōwoca tōnō äāwocaque baī ēwocamīnīpa, ante apænebaingampa.

Quiēmē cæmīni incæ nōingā pōnente cædæmō cæedāni

26 Mänōmaī ī īninque īñānāni, mōnō æbānō cæquī. Wængonguī Önōwoca pōnō cæcā æninque eyepæ inte mīnitō tōmāmīni godongāmæ pōninque īmaī cæmīni incæmīnīpa. Adocanque ämotamīni adodeque angā ingampa. Wacā odōmoncæte ante adodeque apænecā ingampa. Wacā ingante Wængonguī edonque odōmonte apænecā ēñēningā inte tōmengā adodō ante adodeque ante odōmonte apænecā ingampa. Wacā guiquēnē wadāni nāni tede baī adodeque tedecā ingampa. Tōmengā æbānō ante tedecāā, ante wacā do ēñēninque mīnitō tededō wæætē edonque apænecā ingampa. Mänōmaī wade wade ante nē apænemīni inte mīnitō tōmāmīni, Godongāmæ

tæi piñænte entawengæimpa, ante iimaï cæte tedecæminimpa. ²⁷Wadani nani tede bai tedeyongä wacä adotedæ wææ tededämaï incæcäimpa. Mäningä iinque tedecä ate wacä tedecæcäimpa. Ayæ wæætë wacä, Tedecæboimpa, angä Ao ämini tedecä ate idæwaa. Mänimpodänique tedete ñine cädäni adinque wacä ëñëninque, Æbänö ante tededänii, ante minitö tededö edonque apæ necä ëñencæminimpa. ²⁸Codito ingante mini pönencabo weca në ëñente adodö apænequëngä dæ angä iinque edæ wadani nani tede bai në tedeinente wæcä iñömö wæætë ee adinque tededämaï inte pæ wë necæcäimpa. Tömengä nämä incæ önöwënenque tedete Wængongui ingante tedecæcäimpa.

²⁹Wængongui beyæ në apænedäni adobai mengäa pöni apænedäni ate idæwaa. Mänimpodänique apænedäni ëñëninque minitö, Nö ante apænedänii, idiquibæ ante apænedänii, ante apænte ante ëñencæminimpa. ³⁰Ayæ adocanque tæcæ apænee göñongä wacä në ëñëë congä ingante Wængongui Önöwoca iñontobæ apæ necä ëñëninque tömengä, Botö apæ necæboimpa, angä ëñëninque në apænedingä wæætë apocænë edæ ëamonca ëñëë concæcäimpa. ³¹Edæ Wængongui beyæ apænedinque adocanque täno apænete ñine cæcä ate wæætë wacä wæætë wacä apænete ñine cæcæcäimpa. Mänömaï cædinque minitö godongämæ ëñente badinque wampo bawënente ongoncæminimpa. ³²Wængongui beyæ në apænedäni iñömö tömënanäni nämä önöwoca wææ äninque önöwënenque wædämaï inte ocai pönente apænedänipa. ³³Edæ Wængongui incæ në gänë pönëngä inte Yæ yæ wapiticæ godö

tededāmaī ingampa cæmīnii.

Wængonguī quīnāni Codito ingante nāni pōnencabo tōmānāni wayōmō nāni cabo wayōmō nāni cabo godongāmæ pōninque nāni cæī bai cædinque, ³⁴ mīnitō adobaī Codito ingante mīni pōnencabo godongāmæ pōñōmīni onquiyænāni inānite āmīni tededāmaī incædānimpa. Edæ, Apocænē ēñēmæwedāni, ante Mōitee wodi nānō wææ angāī bai cædinque onquiyænāni wæætedō wææte ānāmaī inte onguīñænāni nāni ānonque ēñēninque edæ ēñēē concædānimpa. ³⁵ Æbānō ante apænedānii, ante ēñencæte ante wædinque onquiyængā oncōnē gote ate angā ēñēninque tōmengā nānōogængā wææte adodō apænecā ēñencæcāimpa. Edæ Codito ingante mīni pōnencabo godongāmæ pōñōmīni onquiyængā iñōmō, Guīñēnete awædō, āninque ee tededāmaī incæcāimpa.

³⁶ Iñæmpa, Wængonguī nānō angāinō ante mīnitō adomīnique dicæ mā pōnēninque odōmōmīnitawogaa. Wadāni ēñēnāmaī iñōnānite mīnitō dicæ adomīnique Wængonguī nānō apænedō ante ēñēmīnitawogaa. ³⁷ Bitō, Wængonguī beyæ nē apænebo īmopa, āmitawo. Wængonguī Ōnōwoca pōnō cæcā æninque botō eyepæ ēwocadinque nē nanguī cæbo īmopa, āmitawo. Mānōmaī ēwocabi inte do ēñēmi īninque bitō, Mōnō Awēnē nānō wææ angāinō ante Pabodo mānīnonque ante yewæmongampa, ante, Nāwangā impa, ante apænebaīmipa. ³⁸ Wææte mānīnō ante æcānō ēñēnāmaī ina tōmengā ingante wææte mōnō ēñēnāmaī ingæimpa.

39 Īñānāni, Mānōmaī impa, ante pōnēninque mīnitō, Wængonguī beyæ apænecæimpa, ante cæcæte ante cōwē nanguī cæedāni. Ayæ, Pancadāniya wadāni nāni tede baī apænedānīpa, ante adinque mīnitō Baa ānāmaī ĩedāni. 40 Incæte quīēmē cæmīni incæ mīni pōnencabo mīni godongāmæ watapæ quēwenguinque ante nōingā pōnente ædæmō cæedāni.

15

Codito ñāni òmæmongacæimpa, ante

1 Nōwo botō tōniñamīni ēñēedāni. Codito ingantedō ante botō do watapæ apænebo ēñēninque mīnitō mānīneque ante Ao ante wede pōnēninque edæ tæī ongōmīnitapa. Nōwo guiquēnē mīnitō, Mānīne ante æbānō intawoo, ante oda cædāmaī incæmīnimpa, ante botō adodō ante ædæmō odōmonte yewæmōmoī aedāni. 2 Mānīne ante watapæ apænebo ēñēninque edæ mīnitō adode ante wede pōnēninque tæī ongōmīni inte edæ mānīne beyænque quēwēmaīmīnīpa. Wæætē mānīne botō watapæ apænedō ante æmæ pōnēmīni ĩinque mīni pōnēnimāmo incæ ònōmāmoque pōnī babaimpa.

3 Edæ mōnō Codito tōmengā nānō pōnō cægainō ante botō ēñēnō ante botō doyedē, Mānīne ante mōnō tāno pōnengæimpa, ante pōnō apænebo ēñēmīnitapa. Nōwo wæætē, Ēñencæmīnimpa, ante botō adode ante yewæmōmo acæmīnimpa. Wængonguī angā ēñēnte nāni yewæmongainō baī ĩinque cædinque mōnō Codito ĩñōmō wēnæ wēnæ

mönö cægainö ante teemē mongænte wæætē wængacäimpa, ante impa.

⁴ Ayæ, Wængä ate tömengä baö ini ö ænte mäo daga wengadänimpa. Ayæ Wængongui angä eñente nāni yewæmongainö bai cædinque Codito mēönaa go adoönæque iñonte do ñāni ömæmonte miingä quëwengacäimpa, ante mänine ante impa. ⁵ Ayæ ñāni ömæmonte quëwëngä inte tömengä dobæ Pegodo weca ponte a ongongä acantapa. Ayæ ate tömengä nänö nē emiñængaināni, Dote, nāni änönāni weca dobæ ponte a ongongä adänitapa. ⁶ Ayæ ate mönö tönñadāni quñiento ganca ayæ godömenque nangui ināni godongämæ ongöñönāni tömengä tömënāni weca do ponte edæ a ongongä adotedæ agadänimpa. Iñāni iñömö pancadāniya ñöwo do wængadänimpa. Pancadāniya nangui ināni nē againāni incæ ayæ miināni quëwënanipa. ⁷ Mänināni adāni ate Itota wæætē Tantiago weca a ongongä agacäimpa. Ayæ ate tömengä nänö nē da godongaināni weca adocä Itota ponte a ongongä agadänimpa. Itota mänömaï cægacäimpa, ante botö, Mänine täno pönengæimpa, ante yewæmöpä.

⁸ Botö guiquënë nē wæmpodingä bai inte wæyömote tömengä ñöwo pönï botö weca a ongongä atabopa. ⁹ Edæ Codito tömengä nänö nē da godongaimo imo incæ botö wadāni tömengä nänö nē da godongaināni bai wii adobai imopa. Edæ Itota ingante godongämæ nāni pönencabo inānite nē togænte pangaimo inte botö wädämo pönï imopa. ¹⁰ Edæ æbämë imo incæte Wængongui waadete pönö cæcä beyænque botö mänömaï imopa. Edæ tömengä nänö pönö cädö ante botö

wīi önonque cæcæte ante æmoimpa. Wæætē wadāni wædænque cæyönāni tōmengā waadete pönö cæcā æninque botö godömenque nanguī cætabopa. Incæte botö dicæ tōmēmoque adoboque cæbogaa. Wæætē Wængonguī nānō waadete pönö cædö ænimo inte botö tōmengā tönö cædinque nanguī cæbo imopa. ¹¹ Ìninque botö apænebo incæ tōmēnāni apænedāni incæ mōnō Codito tōmengā nānō pönö cægainonque ante tōmāmōni apænemōnipa. Mänineque ante apænemōni ēñēninque mīnitö mänineque ante pönēmīnitapa.

Do wængaināni incæ ñāni ömæmoncædänimpa, ante

¹² Ìninque, Codito do ñāni ömæmongacäimpa, ante apænemōni ēñēmīni incæte pancamīniya, Nē wængaināni dicæ ñāni ömæmönāniyaa, ante ædö cæte anewēmīni. ¹³ Ìñæmpa, Cōwē ñāni ömæmönāmaī ināni bai mōnō Codito incæ adobai ñāni ömæmönāmaī incædongäimpa. ¹⁴ Ayæ Codito ñāni ömæmönāmaī ingā bai tōmengā waa pōni nānō pönö cægainö ante quīnante apænequēnēmōnii. Edæ önonque pōni bacædönimpa. Ayæ önonquedö ante apænemōni bai mīnitö mänine ante pönēmīni incæ ædö cæte quēwenguēnēmīni. ¹⁵ Mōnitö godömenque Wængonguī ingante ante apænedinque, Codito ingante Wængonguī incæ angā ñāni ömæmongacäimpa, ante apænetamōnipa. Ìninque, Nē wængaināni cōwē ñāni ömæmönāmaī inānipa, ante mīni anewēnō inōmō nāwangā i bai mōnitö Wængonguī nānō cægainö ante babæ wapiticæ ante edæ apænecædömōnimpa. Edæ, Cōwē ñāni

ömæmönāmaī īnānīpa, ante mīni ānewēnō nāwangā ī baī Wængonguī, Nāni ömæmōe, ante ædō cæte anguēnengāā.

16 Īñæmpa, Nāni ömæmönāmaī īnānīpa, ante mīni ānewēnō nāwangā ī baī Codito incæ adobaī ñāni ömæmönāmaī incægacāimpa. 17 Ayæ Codito ñāni ömæmönāmaī ingā baī mīnitō mīni wede pōnēnō incæ önonque pōnī pōnente incædōnīmpa. Īnīnque wentamō mīni mongæno ædō cæte ñā mēnongaquēnēmīnī. Mīni wēnæ wēnæ cædinō beyæ wentamō mongænte wæcædōmīnīmpa. 18 Mānīnō ante mīni ānewēnō nāwangā ī baī Codito nempo quēwēnīnque do wængaīnāni incæ do mempoga wænīnque ædō cæte quēwenguēnēnānī. Quēwēnāmaī incædōnānīmpa. 19 Codito pōnō ængā beyænque mōnō adopoque wænīnque wæætē wænāmaī quēwengæīmpa, ante mōnō inguīpogaque pōnēnīnque wæmo baī wadāni wædænque wæwēñōnāni mōnō godōmenque nanguī wæwenguēnē incædōnīmpa.

20 Incæte Codito dobæ ñāni ömæmongacāī apa ānewēmīnī. Edæ waodāni tānomō amīñayonte tā pedāni baī cædinque Wængonguī adobaī, Do wængaīnāni īnānīte āmo ñāni ömæmoncædānīmpa, ante cæcæte ante cædinque Codito Tānocā ingante do angā ēñēnīnque ñāni ömæmongacāīmpa. Nāwangā impa, ante āmo ēñēmaīmīnīpa. 21 Edæ waocā incæ adocanque ēñēnāmaī cæcā beyænque mōnō wænguīmāmo pongatīmpa. Ayæ nē wænguēnēmō inte wæyōmonte Nōwocā Waocā ēñagāingā inte wænīnque ñāni ömæmongā beyænque mōnō ñāni ömæmonte quēwenguīmāmo

adobaï pongatimpa. ²² Edæ mæmæ Adäo wodi tömengä tönö tömämö godongämæ nê wænguënemö bagaimö inte mönö tömämö adobaï Codito tönö godongämæ nê ñäni ömæmonguimö bagamöimpa. ²³ Incæte to amiñayedê tänomö näni tä pedömö bai inongä inte mönö Codito adobaï Tānocä inongä inte edæ täno ñäni ömæmongacäimpa. Codito nempo nê quëwënömö guiquënë mönö ayæmö inömö inte edæ tömengä nänö ponguionæ iinque ba ate mönö mäniñedê ate nê ñäni ömæmonguimö imompa.

²⁴ Mäniñedê ate inguipoga awënë odeyeidi nempo ongoncoo incæ Codito tömancoo ö ænte ömæe ewencæcäimpa. Ñænænäni näni änömämo adobaï tömämämo ömæe ewencæcäimpa. Tæi piñænäni näni nanguï cædoncoo incæ Codito adocä incæ tömancoo wido cæcæcäimpa. Ayæ adocä nê Awënë Odeye inongä inte tömengä nempo ongoncoo wæætê edæ Mæmpo Wængonguï nempo edæ pædæ godongä æninqe Mæmpo Wængonguinque tömenganque adocanque Awënë Odeye inongä incæcäimpa. Mäniñedê ate edæ ñöwo mönö quëwëmämo iñömö edæ iinque baquinö anguënë. ²⁵ Incæte Wængonguï Codito ingante, Bitö imite nê piinte cægäinäni tömänäni inänite mö gongæncæbiimpa, ante cædinque tömengä önöwa gäänê nänö wææntodonganca edæ adocä Codito incæ mäninö nänö iinque cæganca nê Awënë inongä ingampa.

²⁶ Ayæ tömengä ingante nê piinte cædäni inänite æmæwo bæ tacä adinque adoque pöni mönö wænguimämo incæ ayæ ongö adinque Wængonguï,

Mänimämo dæ bacæimpa, ante mäo ömæe ewencæcäimpa. ²⁷ Tömengä nempo Wængongui tömancoo pædæ godongä æninque tömengä nē Awënë bacæcäimpa, ante do yewæmongatimpa. Mänömainö ante yewæmonte ongö incæte Wængongui nē pædæ godöngä inte ædö cæte, Nämä pædæ godömopa, anguingää, ante edonque acæimpa. ²⁸ Ayæ ate Wængongui Wengä incæ, Mæmpo Wængongui botö nempo tömancoo nē pædæ pönongä inte tömengä adocanque pöni Täiyæ Awënë badinque tömenganque tömancoo enempocæcäimpa, ante cæcæcäimpa. Mänömaï cæte ate tömengä adobai Mæmpo Wængongui nempo quëwëninque Mæmpo nänö änonque ante eñente cæcæcäimpa.

²⁹ Pancadäniya edæ, Do wængainäni beyænque cæmönipa, ante cædinque tömënäni beyæ æpænë guidänipa. Ìninque, Ñäni ömæmönämaï ingæimpa, ante mini änewënö näwangä i bai tömënäni æbänö cæquënänäni inänii. Edæ, Ñäni ömæmönämaï ingæimpa, ante näwangä i bai edæ tömënäni nē wængainäni beyæ quïnante æpænë guiquënänänii. ³⁰ Ayæ mini änewënö näwangä i bai mönitö iñömö quïnante möni wantæ iñö wantæ iñö wodo wænguïnö ante wæquënëmönii. ³¹ Botö iimö iñö iimö iñö do wæwocabo inömo imopa, ante näwangä ämopa. Botö mönö Awënë Itota Codito nempo quëwëninque mïnitö iminite ante pönëninque watapæ tobopa, ante näwangä antawoo. Edæ botö tönïñamini iñöminite botö mäninö ante näwangä änimö inte, Wæwocabo imopa, ante adobai, Näwangä impa, ante ämo eñëmaimïnipa. ³² Waomö

mönö æinēnō æncæte ante botō epetoidi babæidi bai ināni tönō guēa wæætedō wæætē cæbo bai ōnonque cæte incædōnimpa. Edæ, Do wængaināni ñāni ōmæmōnāmaī incædānimpa, ante nāwangā i bai botō, “Īimō ate mönō æmæwo wænguinque ante cænte bete tocæimpa,” ante nāni ānewēnō bai ante ee quēwencædōmoimpa.

³³ Īñæmpa mǎnōmaīnō ante tedewēnāni ēñēninque mīnitō wæætē oda cædāmaī ĩmæwedāni. Edæ do yewæmōninque, “Wīwa cædāni tönō guēa cædinque bitō adobaī wapiticæ quēwenguinque godongāmæ cæbipa.” ³⁴ Ante wææ ānāni ēñēedāni. Edæ, mīnitō wēnæ wēnæ cæmīni adinque Wængongui ingante ante ēñēnāmaī ināni ĩñōmō oda cæbainānīpa. Mǎnōmaī beyæ mīnitō guingo ĩmonte wæquēnēmīni ĩnōmīni inte nō cæte quēwēninque edæ wēnæ wēnæ cædāmaī ĩedāni.

Do wængaināni ĩmaī ñāni ōmæmoncædānimpa, ante

³⁵ Bitō, Do wængaināni æbānō cæte ñāni ōmæmonguīnānīi, ante āmitawo. Ayæ, Ñāni ōmæmōninque mönō baō quīnō bai ēñate ponguīmōō, ante ēñencæte ante wæbitawo.

³⁶ Īñæmpa ōnonquedō ante wæbi awædō. Edæ waocā tōmēmō quiyacā ate yabæque ñōmāate ate tā bocate pædīmō bai mönō baō adobaī inte ñōmængæimpa. ³⁷ Īñæmpa todigo incæ wawæ incæ bitō, Tā bocate pæcæimpa, ante cædinque do pædiwæ tōmēwæ ænāmaī inte tōmēmonque ænte godō quiyabi ate tā bocate pæpa. ³⁸ Incæte, Tōmēwæ æbānō ĩwæ pæquīwæ, ante nāmā nānō angainō bai cædinque Wængonguinque pōnō

badongä ate tä bocate pæpa. Wamö tä bocate pædinque æbänö incaquüi, wamö æbänö incaquüi, ante do eñengaingä inte Wængongui pönö badongä ate wainca wainca incapa.

³⁹ Tömännö baö wii adoyö bai eñompa. Mönö waomö baö wayö eñamompa. Ööingäidi baö wayö eñadänipa. Ayamöidi baö wayö eñadänipa. Gäyæidi baö wayö eñadänipa. ⁴⁰ Ayæ öönæde quëwënäni wayö mongæñönäni ingui-poga quëwëmö iñömö wayö eñamompa. Ininque öönæde quëwënäni waa näni eñadö wayö iñonte ingui-poga quëwëmö waa pönö mönö eñayö guiquënë wii adobai eñamö imompa. ⁴¹ Woyowotæ apäicä iñömö itæde nænque nänö apäi bai wii apäicampa. Pönömenque pönö apäicampa. Nëmöidi guiquënë wadö bai apäidänipa. Edæ nëmöidi incæ pancadäniya ñämöinäni inte wædænque apäiyönäni pancadäniya waa pönö emönäni inte guinæ nangui apäidänipa.

⁴² Mänii quiyadimö yabæque ñömäate ate tä bocate pædimö bai mönö adopoque wæmö ate mönö baö adobai aquiñö inte ñömæmpa. Wæætë iincayæ ate mönö baö ñömäadamaï inguinque wæætë ñäni ömæmonguimö imöimpa. ⁴³ Ayæ mönö guinëñate wægaiñö wido cæte ate mönö waa pönö eñaque ñäni ömæmongæimpa. Edæ mönö aquiñö wido cædinque mönö tæi piñæñö baaquinque ñäni ömæmongæimpa. ⁴⁴ Edæ ingui-pogaque quëwëninque mönö eñayö wido cæte ate mönö öönæde pönöwoca eñate ewocadinque mönö waiñö pönö eñate ñäni ömæmongæimpa.

⁴⁵ “Adäö wodi tänocä inongä inte në ewocacä badinque quëwengacäimpa,” ante

yewæmongatimpa. Ayæ adobaï Adäo wodi baï Ñöwocä mönö Codito incæ nê ewocacä inte quëwëninque mönö imote pönongä æninque ewocate quëwëmompä. ⁴⁶ Inguipogaque nê quëwengä guiquënë täno pongacäimpa. Mempoga nê Quëwënonngä guiquënë ñöwoque ayæ pöningä inte nê Quëwengä ingampa. ⁴⁷ Tānocä ingante badoncæte ante Wængonguï onguipoi guiidimöi æninque badongacäimpa. Ñöwocä guiquënë öönædë quëwengaingä inte pongacäimpa. ⁴⁸ Inguipogaque ante quëwënanï guiquënë inguipoga täno quëwengaingä baï adobaï inänipa. Öönædë mönö goquincabo guiquënë öönædë quëwente Pongaingä baï adobaï imompä.

⁴⁹ Inguipogaque quëwengä nänö ëñayö baï mönö adobaï ñöwo ëñamompä. Ìncayæ ate guiquënë öönædë quëwente nê Pongaingä nänö ëñayö baï mönö adobaï ëñaquimö imompä.

⁵⁰ Botö tönïñamini apænebo ëñëedäni. Adopoque ëñagaingä inte Wængonguï Awënë Odeye nempo ædö cæte guiite quëwenguingä. Nê aquïñö ñömænguïñö ëñadongä incæ tömengä mempoga ëñadämaï inte ædö cæte baö ñömäadämaï inö ëñaquingä. ⁵¹ Mönö waocabo wëenëñedë mönö ëñënämaï ingainö ante botö tæcæ ëñënimo inte ñöwo edonque apænebo ëñëedäni.

Wii tömämö wænguimö imompä. Incæte tömämö inontobæ wayonque ëñaquimö imompä. ⁵² Edæ todompeta mönö ancadeca æmæwo pöni nanguï öönäni ate mönö awinca adopoque bomö cæyömonte inontobæ bacäimpa. Edæ todompeta tæcæ we öönönäni do wængainäni

incæ ñömænāmaï nāni inguinque ñāni
 ömæmoncæðānimpa. Māniñedē edæ wayonque
 pōni mōnō tōmāmō eñacæmōimpa. ⁵³ Edæ mōnō
 baō mōnō aquī ñömænguīñonque wido cæte ate
 mōnō ñömænāmaï inguiñonque eñaque impa.
 Ayæ mōnō aquī wænguīñō ewente ate waiñonque
 mōnō wænāmaï inguiñō eñacæimpa. ⁵⁴ Mōnō
 ñömænguīñō eñamō adinque Codito waiñō
 pōnongā ænte eñadinque mōnō baō ñömænāmaï
 ingæimpa. Ayæ mōnō wænguīñō eñamō adinque
 tōmengā mōnō wænāmaï inguiñō ante waiñō pōni
 pōnongā eñacæimpa. Mānōmaï cæcā ate dodāni
 nāni yewæmonte angainō tōmāā iinque cæte
 ingæimpa. Edæ iīmaï ante yewæmongadānimpa.
 “Mōnō Codito nē tæi piñænogā inte mōnō
 wænguīmāmo godō ömæe ewēnque gānā
 cæcæcäimpa. ⁵⁵ Iinque önonque bagai inte mōnō
 wænguīmāmo iñömō dicæ tæi piñænte cæpa
 æmæwo wænguimōö. Mōnō wænguīmāmo incæ
 dicæ daapa emiñæmpa guī wænguimōö.”

⁵⁶ Mōnō wænæ wænæ cægainō beyænque
 mōnō daapa guite bai pante wæquinque nē
 wænguēnēmō ingamōimpa. Ayæ eñēnāmaï
 cæyōmonte Wængongui wææ angā beyænque
 mōnō nē pante wæquinque nē wænguēnēmō
 bagamōimpa. ⁵⁷ Wæætē mōnō Awēnē Itota
 Codito gānā cædinque mōnō wænguēnēmāmo ante
 godō ömæe ewengā beyænque Wængongui mōnō
 imonte pōnō cæcā ate gānā cæmōimpa. Iinque,
 Mānōmaï waa pōni cæcampa, ante pōnēnque
 mōnō Wængongui ingante waa ate pōnēnque
 apænecæimpa.

58 Mänömaï beyæ botö nē waadete tönīñamīni eññēdāni. Mīnitö, Mönö imonte bæ tadāmaï incädānimpa, ante adiyæ tæi ongonte wææ cæedāni. Edæ, Mönö Awēnē nempo quēwēninque nanguï cæmō īninque mönö cædinō īñömō edæ cōwē ēwēnāmaï ingæimpa, ante pönēninque mīnitö mönö Awēnē beyæ ante cōwē godōmenque gomonga cæcæmīnimpa, ämopa.

16

Wængonguï quīnāni beyæ iïmaï cæte godongæimpa, ante

¹ Nōwo īñömō mīnitö godonte æinta ante, Wængonguï quīnāni beyæ impa, ante mīni godonguēnēnō ante apænebo eññēdāni. Gadatiabæ īñömō Itota ingante godongāmæ nāni pönencabo īnānite do ānimo inte botö mīnitö imīnite adobaï ante iïmaï ämo cæedāni. ² Mīnitö tōmāmīni, Botö ænincoo æpodö i, ante adinque, Pancaa Wængonguï quīnāni quī baquimpa, ante cædinque Wængonguï itædē īñö pancacooga nānēnē cō cædinque wacā Wængonguï itædē īñö pancacooga nānēnē cō cædinque ee mäedāni. Īninque wæætē wæætē cō cæte eyepæ māmīni adinque botö mīnitö weca ponte adinque, Godōmenque cōö cæedāni, ante ānāmaï inguēnēmo iïmopa. ³ Edæ botö mīnitö weca ponte āñōmo mīnitö, Īināni nō cædōnāni inte mōnitö godōnincoo ænte māo godoncædānimpa, ante odōmōmīni adinque botö wæætē tōmēnāni beyæ cadota ante yewæmoncæboimpa. Ayæ cadota tönö mīnitö pönōnoncoo tönö botö iināni īnānite pædæ

godöninge da godömo ænte mæo Eedotadëe gote nënemrocædänimpa. ⁴ Ayæ Wængonguï Ao angä ate botö tömënäni bai adobai gobo adinque tömënäni botö tönö godongämæ edæ gobainänipa.

Ïimai gocæboimpa, ante

⁵ Cöwë Mäatedöniabæ wodo pänta gocæboimpa. Ìinque mänimæ täno wodo pänta gote ate botö ayæ wæætë mīnitö weca poncæboimpa.

⁶ Ayæ mīnitö weca pöninge wabänö wantæ ïñö quëwente goquïmo. Æbämë cæcæboimpa. Edæ, Quëwente ate ædömë gomonga gocæ cæyömo mīnitö botö tönö godongämæ waa cæmīni ate waa gocæboimpa, ante pönëninge botö wabänö godömenque quëwëninge tömää mönö yoguaintedæ incæ mīnitö weca quëwencæboimpa.

⁷ Edæ, Botö wodo pänta gocæ cædinque mīnitö weca ñöwo pömo bai wantæ ïñö ëñaquinque incædönimpa, ante pönente wædinque botö wii ñöwo pöinëmo ïmopa. Wæætë, Wængonguï Ao angä ate botö ïincayæ ate mīnitö weca ponte wantæpiyæ quëwëninge tocæboimpa, ante pönëmopa. ⁸ Wæætë möni oodeocabo ææmæ Pentecotee möni änömæ ïinque beganca botö Epeto adoyömö quëwencæboimpa. ⁹ Edæ Epeto ïñömö quëwënäni wede pönente bacædänimpa, ante botö guiite apænequinque odemö bai wi ænete bai ongö abopa. Ayæ adobai, Në piinte cædäni nanguï inäni mæ ongönänipa, ante adinque botö adoyömö quëwëninge nanguï wææ apænecæboimpa.

¹⁰ Timoteo mīnitö weca wabänö ponguingä. Pongä ïinque mīnitö wæætë, Mönitö weca guïñënämaï inte quëwencæbiimpa, äninge tömengä

ingante waa cæedäni. Edæ botö nê cæbo ïmo baï tömengä adobaï Wængonguï beyænque nê cæcä ingampa. ¹¹ Ìninqe, Tímoteo önonque cæcampa, ante tedewënämaï inte mînitö tömengä ingante Baa änämaï incæmînimpa. Wæætê waadete cædinque da pönömîni ate tömengä piyænê cæte botö weca adodö poncæcäimpa, ämopa. Edæ, Mönö tönîñadäni tönö Tímoteo godongämæ poncæcäimpa, ante pönëninque botö wänö cömopa.

¹² Botö mönö tönîñacä Apodo ingante guiquënê, Mönö tönîñadäni tönö bitö coodintoidi weca êñate pöe, ante ancaa ämo incæte tömengä wæætê, Ñöwo wïi goquïmo, ante Baa angantapa. Incæte Wængonguï Ao angä ate tömengä ïincayæ ate mînitö weca cöwê poncæcäimpa.

Waa quëwencæmînimpa, ante

¹³ Mînitö guiquënê cöwä ate nämä wææ aedäni. Wede pönëmîni inte tæi gongænte ongödäni. Æmæwo pægäimîni inte tæi piñænte entawëninque guiñênämaï inte ee cæedäni. ¹⁴ Ayæ tömäa quiëmê cæmîni inte waadete pönëninque cæedäni ämopa.

¹⁵ Botö tönîñamîni mînitö ïmaï ante do êñëmînipa. Acayabæ ïñömö täno pönengäinäni inte Etepänä näni quëwencabo ïñömö, Wængonguï quïnäni ïnänite nê cæmöni bacæmönimpa, ante ñöwo cædänipa cæmîni. ¹⁶ Ìninqe mînitö Wængonguï quïnäni beyæ nê cædinäni ïnänite Ao äninque piyænê cædinque tömënäni näni änö baï do êñente cæedäni. Ayæ, Wadäni adobaï, Mönö tönö godongämæ nanguï cædänipa, ante adinque mînitö tömënäni näni änö baï do êñente cæedäni.

17 Etepänä tönö Podotönato ayæ Acaico botö weca pöningue mīnitö botö beyæ mīni cæinēnō ante do cædāni ate nanguī totabopa. 18 Edæ tōmēnāni pōnō apænedāni ēñēningue mīnitö wampo pōnente tæi piñænte ewocamīnitawo. Ayæ adobaī pōnō apænedāni ēñēningue mōnitö wampo pōnente tæi piñænte ewocamōnipa. Mānōmaī nē pōnō cædināni inānite mīnitö wæætē waa ate pōnēningue cæquēnēmīni imīnipa.

19 Atiabæ iñōmō Codito ingante godongāmæ nāni pōnencabo nāni cabo nāni cabo tōmānāni mīnitö imīnite ante pōnēningue, Waa quēwencæmīnimpa, ante apænedānipa. Aquidæ tönö Pidica nāna gæncaya adobaī ayæ tōmēna oncōnē Codito ingante pōnente godongāmæ pōningue nāni pōnencabo adobaī mīnitö imīnite waadete pōnēningue, Mōnō Awēnē nempo waa quēwencæmīnimpa, ānānipa. 20 Mōnō tōniñadāni tōmānāni, Waa quēwencæmīnimpa, ante apænedānipa. Mīnitö guiquēnē mīni cabo godongāmæ pō bee tēningue waadete pōnente waa apæneedāni, āmopa.

21 Botö Pabodobo iñōmō tæcæ tōmēmo ōnompoca yewæmōningue, Waa quēwencæmīnimpa, ante tōmēmo yewæmōmopa.

22 Æcānō mōnō Awēnē ingante waadete pōnēnāmaī ina iñōmō tōmengā nānō wænguingue mānōmaī cæcampa tōö. Botö iñōmō wæætē, Mōnitö Awēnē imi pōe, ante wæbopa.

23 Mōnō Awēnē Itota waadete pōnō cæcā æningue mīnitö tōmengā nānō waadete pōnō cædō entawēningue waa quēwencæmīnimpa. 24 Codito Itota nempo mōnō quēwencabo imompa, ante

pönëninque botö mīnitö imīnite waadete pönëmopa.
Mäninque ante yewæmömopa.

Wængonguï nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

9bedab5a-39ff-5163-a35b-8056cbbe8690